

摘藻堂四庫全書薈要

經部

欽定四庫全書薈要卷一千三十二

經部

詩緝卷三十二

宋嚴粲撰

清廟之什

周頌

譜曰周頌者周室成功致太平德洽之時其作在周公攝政成王即位之初○疏曰雅不言周頌言周者以別商魯也周蓋孔子所加也先代之頌必是獨行為一代之法孔子論詩乃次魯商於下以示三代之法既有商魯須題周以別之故知孔子加周也頌序稱祀告及朝廟於廟之事亦多矣唯敬之小忌不言廟祀而承謀廟之下亦當於廟進戒廟中求助者○蘇氏曰周頌皆有所施於禮樂蓋因禮而作頌非如風雅有徒作而不用者也周頌篇第之先後則不可究矣○朱氏曰周頌三十一篇多周公所定周頌多不協韻未詳其說○補傳

曰周頌皆一章商周二頌皆用以告神明而魯頌乃用以為善禱後世文人獻頌特効魯耳非商周之舊也

清廟祀文王也周公既成洛邑

朱氏曰王在新邑烝祭歲文王騂牛一武王騂

牛一實周公攝政之七年而此其升歌之辭也朝諸侯

朝音潮○李氏曰周公時相成王以朝諸侯而

已周公非自居南面而受諸侯之朝也明堂率以祀文

位云周公踐天子之位朝諸侯於明堂非也王焉

疏曰祀文王之樂歌也祭宗廟之盛歌文王之德莫重於清廟故為周頌之首○今考疏以周頌皆

樂歌下皆同

於穆清廟

於音烏○傳曰於歎辭也穆美也○釋文曰清廟者杜預云肅然清靜之廟也肅雝

顯相去聲○傳曰肅敬也雝和也相助也○箋曰有光明著見之德者來助祭○詩記曰士虞禮祝辭云

哀子某哀顯相夙興夜處不寧然則自主人之外餘皆顯相也成王祭主也周公及助祭之諸侯皆顯相也

濟濟多士

濟齊之上○濟濟解見文王○詩記曰顯相多士廣言助祭之人凡執事者皆在也秉

文之德

今曰秉持謂不忘也

對越在天

曹氏曰對答也越揚也對答而發揚之也

駿奔

走在廟

駿音峻○疏曰駿疾也詩記大傳亦云駿奔走疾奔走言勸事也

不顯不承

朱氏

曰承謂見尊奉也

無射於人斯

射音亦○傳曰射厭也○朱氏曰斯語辭也

嗚呼美哉此祀文王清靜之廟也有肅肅其敬雖雖

其和者顯相之人也稱助祀之人曰顯相者謂其有

顯著之德美稱之也此濟濟然衆士皆秉持文王之

德不忘於心也答揚於在天之靈謂如見文王洋洋
在上也鬼神本無迹對答之則如與之接發揚之則
在隱若顯也疾奔走於在廟之事謂敏於趨事無敢
後先也於是贊美文王之德豈不顯乎豈不奉承於
人乎無厭射於人矣

疏曰書大傳說清廟云周公升歌文王之功烈德澤苟在廟中

嘗見文王者愀然如復見文王焉○詩記曰相維辟公天子穆穆言顯相之肅雖則成王穆穆然奉祭之氣象不言可見矣○劉氏曰文王之德至矣不可得而形容所可述者特見於多士所秉而已

清廟一章八句

維天之命太平告文王也

大音泰。蘇氏曰：天下太平，以為文王之德之致也。故以

告之

維天之命

箋曰：命猶道也。程子曰：天命即天道也。以其用言之，則曰命造化之謂也。又曰：言天命

之自然者曰天道，言天之賦與萬物者曰天命。於穆不已

於音烏。於穆，解見清廟。疏曰：易繫辭

云：日往則月來，暑往則寒來，象曰：天行健，是天道不已止之事也。

於乎不顯

於乎音

文

王之德之純

子思子曰：純亦不已。程子曰：純則無二，無雜不已，則無間斷先後。張子曰：純則

舉大假以溢我

假蘇音嘏。毛音暇。溢音逸。蘇氏曰：假本也。箋曰：溢盈溢也。歐陽氏曰：如

水溢而我其收之

朱氏曰：收受也。今曰：收謂不敢失之也。

駿惠我文王

駿音

峻○箋曰駿大也惠順也

曾孫篤之

箋曰曾猶重也自孫之子而下事先祖皆稱曾孫○傳曰篤厚

也○疏曰用意專而隆厚也○詩記曰說詩者非惟有

鑿說之害亦有衍說之害如此詩曾孫篤之毛氏謂能

厚行之於文義未有害也然詩人之意本勉後人篤厚

之而不忘所謂行者固亦在其中矣但曰曾孫篤之則

意味深長衍一行字意味却短至王氏遂云篤力行而

有所至說益詳而無復餘味矣凡諸說皆當以此例之

天之賦予萬物謂之命即天理也於乎美哉是天之

運行不已也造化之機或息則其賦物者窮矣於乎

甚顯者是文王之德純一也純則無二無雜矣凡言

聖人如天者以此擬彼天與聖人猶為二也此詩但

以天命之不已與文德之純對立而並言之天之為
文王邪文王之為天邪蓋有不容擬議者子思子發
明之曰天之所以為天也又曰文王之所以為文也
其旨深矣文王之德假大而盈溢於我我當有以收
之使不失墜惟在大順文王之德而已其者自期之
辭收謂保其業惠謂體其德大惠則無斯須毫釐之
違戾也我既以駿惠文王自勉繼自今為文王之子
孫者當世世篤厚之勿忘也去聖浸遠典刑易墜非

用意篤厚不能守也

維天之命一章八句

維清奏象舞也

蘇氏曰象文王之樂文舞也

象文舞也鄭氏以象舞為象用兵時刺伐之舞如此則為武舞矣且維清象舞之樂歌舞大武之樂歌大武為武舞故武頌言勝殷遏劉之事維清不言征伐則象舞決非武舞也文王之文德至矣作樂象德乃獨象其刺伐非其義矣○今考鄭於禮記文王世子

明堂位祭統升歌清廟下管象皆以管象為武王之
舞謂周頌舞也孔申鄭義以文王武王之舞皆名為
象維清象舞為文王下管象為武王其意蓋謂清廟
與管象若皆為文王不應有上下之別故耳古樂歌
者在上以人歌者皆曰升歌亦曰登歌匏竹在下以
管奏者皆曰下管春官大師帥瞽登歌下管奏樂器
益稷下管鼗鼓是也清廟以人歌之自宜升象以管
奏之自宜下凡樂皆有堂上堂下之奏也

曹氏曰季
札觀樂見

舞象削南籥者杜預云文王樂也又見舞韶削者杜預云舜樂也是象有韶韶亦有削說者謂以竿擊人曰削然則執削以舞猶干舞也執籥以舞即籥舞也文王雖大業未究而本其功德之所起可得而形容也故作樂以象之謂之象舞祭統明堂位文王世子所謂下管象者象即象舞也鄭氏以象舞為專象刺伐然籥非刺伐之物也削音朔季札觀樂事見左傳襄二十九年註以象削之削音朔韶削音簫皆當音朔

維清緝熙

句○朱氏曰清清明也○王氏曰緝續也熙廣也

文王之典

傳曰典法也

肇禋

音兆因○傳曰肇始也○箋曰周禮以禋祀祀昊天上帝

迄用有成

迄欣之入傳曰迄

也至惟周之禎

音貞○傳曰禎祥也

文王之舞謂之象以王業之興其兆已見也此詩乃象舞之樂歌述所以名象之意言清緝熙者文王之典也清則純一而不雜緝則悠久而不已熙則廣大而無外三言備舉文王之聖德而以典言之者謂其德寓於法也禋者王者祀天之禮也文王有典則以貽後人王業雖未成而禋祀之禮已肇始於此遂至其後而有成焉是文王之典為周之禎祥也祥者吉之先見也

維清一章五句

烈文成王即政諸侯助祭也

疏曰謂周公居攝七年致政成王成王乃祭於祖有

諸侯助王之祭既祭因而戒之○蘇氏曰成王有即位有即政則周公之未嘗攝位明矣

烈文辟公

補傳曰烈言其功文言其德諸侯有爵為公者舉其爵之尊以寵之○疏曰辟公諸侯也

○今曰辟君也說命云樹后王君公后王王也君公諸侯也

錫茲祉福

祉音耻○朱氏曰諸侯錫

此祉福○錢氏曰但佐文武定天下也

惠我無疆子孫保之無封靡于爾

邦

王氏曰無封以專利無靡以傷財○朱氏曰封專利以自封殖靡侈也

維王其崇之

補傳

曰維天子之是尊

念茲武功

傳曰戎大也

繼序其皇之

朱氏曰皇大也

無競

維人四方其訓之

李氏抑詩解曰訓效也

不顯維德百辟其刑之

於乎前王不忘

於乎音烏呼○箋曰前王文王武王○黃氏曰此成王感發諸侯不盡之意

成王即政之初周興未久也其助祭諸侯往往身佐
文武以定天下者故先稱美之乃告戒之言汝有功
有德之辟公錫我以此福矣謂其夾輔以興周祚也
此豈徒目前淺近計哉蓋惠我周家以無疆之休使
我子孫世世永保之矣然相與平定之者爾諸侯之
力也其相與扶持之者尤有望於爾諸侯也爾於爾

之國無封殖以專利無侈靡以傷財當維王室之是尊也念屏翰之大功其繼序之序者益思增益而皇大之世世相承無替前功也爾歸治其國在用賢脩德而已莫彊乎維得賢人也能得人則四方皆訓儆之莫光顯者脩德也能脩德則百君皆刑法之矣嗚呼如此則豈唯予寵嘉之實前王所念而不釋也○說者多以辟公為稱諸侯之祖父念茲武功為勉之以念祖父之功今考本紀註徐廣云武王克殷二年

而崩皇甫謐云武王定位元年歲在乙酉六年庚寅
崩正如謐之言武王克殷纔六年又周公攝政七年
共十餘年耳烈文作於成王即政之初孟津諸侯固
多存者不應專戒其子孫也詩記曰於乎前王不忘
嘉之○王氏曰先王之戒諸侯也欲其兢兢則中國
強矣欲其顯顯則中國尊矣欲其四方訓之百辟刑
之則各以德善胥訓胥效也內則百僚師師外則諸
侯胥效則能以天下為一家中國為一人矣而先儒
以謂先王不欲諸侯名譽出境是乃力征經營天
下惴惴恐天下軋已之私意何足以語先王也

烈文一章十三句

天作祀先王先公也

箋曰先王謂太王以下○天保箋曰先公謂后稷至諸盤音籌又音

舟○疏曰祀先王先公謂四時之祭祠禴嘗烝時祭所及唯親廟與大祖於成王之世為時祭當大王以下上及后稷一人而已言先公者唯斥后稷且經之所陳唯有先王之事而序并言先公者以詩人因於祭祀而作此歌近舉王迹所起其辭不及后稷序以祭時實祭后稷故其言及之昊天有成命經無地而序言地般經無海而序言海亦此類也

天作高山

傳曰作生也○疏曰作者造立之言故為生也○箋曰高山謂岐山也

大王荒

之

大音泰○蘇氏曰荒治也○李氏曰始荒而闢之○今曰治荒為荒猶治亂為亂也今諺言開荒即始闢

之意

彼作矣

箋曰彼彼萬民也民皆築作宮室以為常居

文王康之

箋曰康安也

彼徂矣

箋曰徂往也民之往者
○曹氏曰往歸者衆

岐有夷之行

如字王徐
並去聲○

程子曰夷平也○曹氏曰昔者高山之險阻今為坦途
矣○今日夷即皇矣所謂串夷載路行猶行彼周行謂

道路也

子孫保之

遷岐非得已而周乃以岐興詩人以為是非人之所
能為故言此岐山天實為之也岐山本險阻荒僻之
地大王始開荒而闢之彼民皆不憚遷徙之勞築作
而居之矣文王從而安之彼民又皆徂往而歸之矣
作謂舊民之樂遷如百堵皆作庶殷丕作之作也徂

謂新民之歸往如其子焉往之往也歸往者日衆故岐山昔之險阻今為平夷之路矣大王文王之業子孫當保守而不墜也成功告神之頌多言子孫當保守之意蓋子孫能保守則可以慰祖宗之心也

天作一章七句

昊天有成命郊祀天地也

李氏曰蘇黃門謂冬至祀天於圜丘夏至祀地於方澤據

周禮以為說東坡云昊天有成命郊祀天地也此乃合祭天地之明文

昊天有成命

曹氏曰成則不可易

二后受之

傳曰二后文武也

成王不敢

康

箋曰成此王功

夙夜基命宥密

傳曰基始也宥寬也密寧也○箋曰寬仁所以止苛刻安

靜所以息暴亂

於緝熙

於音烏○王氏曰緝續也熙廣也○李氏曰緝熙當為成王

單厥心

單蘇音丹舊音鹽

肆其靖之

今曰書九發語肆字皆訓故○箋曰靖安也

○蘇氏曰單盡也

天所以有不易之成命而文武得以受之者由其能

成此王功不敢康寧夙夜憂勤以肇基天命在行寬

靜之政而已又嗟歎而言為子孫者當緝續而熙廣

之大盡其心庶幾可以安靖之勿墜宥密之初意也

○頌者成功告神必言子孫勉力保守以慰神祇祖

考之意維天之命曰曾孫篤之天作曰子孫保之我
將曰于時保之此所謂緝熙亦成王自勉之辭舊說
以緝熙為文武味詩之意嗟歎而更端言之所謂肆
其靖之即于時保之之意其者期之之辭也非言文
武矣

昊天有成命一章七句

我將祀文王於明堂也

陳氏曰古者祭天於圜丘掃地而行事器用陶匏牲用犢其禮

極簡聖人之意以為未足以報本故於季秋之月有大
享之禮焉天即帝也郊而曰天所以尊之也故以后稷

配焉后稷遠矣配稷於郊亦以尊稷也明堂而曰帝所以親之也故以文王配焉文王親也配文王於明堂亦以親文王也然則郊者古禮而明堂者周制也周公以義起之也

我將我享

箋曰將猶奉也傳曰享獻也

維羊維牛

疏曰禮稱郊用特牲祭法云燔柴於

泰壇祭天用騂犢則明堂祭天亦當特牛矣而得有羊者其配之人自當用太牢也○詩記曰郊特牲云帝牛不吉以為稷牛於是知明堂用牛夏官羊人曰釁積共其羊牲積柴祭天於是知祭帝用羊以父配帝則牲牢不得異食○今考釁謂邦器及軍器成則釁之維天其右之○箋曰右助也下同右之不儀式刑文王之典箋曰儀則也式象也○傳曰必饗之書云嚴祗敬六德也○今日靖四方○陳氏曰靖安也累言之者謂法之不已也

維庶其饗之不敢加一辭焉於文王則言儀式其典日靖四方天不待贊法文王所以法天也卒章惟言畏天之威而不及文王者統於尊也畏天所以畏文王也天與文王一也

伊嘏文王

嘏音假。箋曰受福。

既右饗之

疏曰右助而歆饗之。○李氏曰天若福文王則必饗吾之祭矣。

我其夙夜

畏天之威于時保之

我所將奉我所獻享者維羊維牛而已禮之常也天其右助我而饗此乎蓋不敢必也天之所饗不在於物惟自託於文王庶幾可以格天我今儀則式象刑法文王之典日日施之以安四方惟天惠民惟文

王之典足以安民天福文王則必右助而歆饗我祭
矣其右之者不敢必之辭也既右之者自必之辭也
然我尤當夙興夜寐畏天之威思所以保之其敢自
恃乎明堂之禮天與文王在焉成王寫其中心之誠
以對越而言之也○典毛於維清傳云法也於此云
常也鄭以為常道法者道之所寓其實一也

我將一章十句

時邁巡守告祭柴望也

巡守音旬狩○疏曰武王既定天下巡行其守土諸侯至于方

嶽之下作告至之祭柴祭昊天望祭山川安祀百神乃是王者盛事周公既致太平追念武王之業故述其事而為此歌焉宣十二年左傳云昔武王克商作頌曰載戢干戈明此詩周公作也○曹氏曰諸侯為天子守土其政之得失民之利病不得以周之故天子親自巡省焉廵狩必徧于四嶽每至其方嶽之下則燔柴升煙以告至若其山川之遠而不可至者則望而祭之書所謂至于岱宗崇望秩于山川是也○朱氏曰國語云金奏肆夏樊遏渠天子以饗元侯也即春官鍾師九夏之三也呂叔玉云肆夏時邁也樊遏執競也渠思文也

時邁其邦

傳曰邁行也○箋曰武王時出行其邦國謂巡守也

昊天其子之

詩記曰人

之宗子主一家者也天之子主天下者也時邁其邦人神莫不受職則昊天其子可知矣○朱氏曰天其子我

乎哉蓋不敢必也○今日昊天其子之與維天其實右
右之語意同有天下曰天子子之謂使之為王也

序有周

箋曰右助也序次序也○曹氏曰序帝王之
傳序也○錢氏曰次序者謂以周繼夏商也

薄

言震之

程子曰薄言發語
辭○傳曰震動也

莫不震疊

傳曰疊
懼也

懷柔百神

傳曰懷來也柔安也○曹氏曰祭法云山林川谷丘陵
能出雲雨見怪物皆曰神有天下者祭百神諸侯在其

地則祭之亡其地則不祭溥天之下
莫非王土故巡守所至者神皆祭焉

及河喬嶽

傳曰喬
高也

嶽岱宗也○疏曰巡守之禮必始於
東方故以岱宗言之其實兼四嶽也

允王維后

箋曰允
信也○

陳氏曰信乎
使我為王也

明昭有周式序在位

箋曰式用也○李氏
曰序諸侯之在位者

載戢干戈

戢簪之入○釋文
曰戢止也歛也

載櫜弓矢

櫜音羔○傳曰
櫜韜也韜音滔

○疏曰橐者弓衣一名韜故內弓於衣謂之韜弓

我求懿德

箋曰懿美也

肆于時夏

箋曰肆陳也○李氏曰時夏中國也

允王保之

巡守王者之禮武王初定天下時出巡行其邦國天其子之乎設為問辭也應之曰天實右序有周矣武王之巡守也於諸國薄警動之諸侯莫不震懼又所至方嶽之下懷柔羣神望祀河嶽初得天下而人神受職此非人之所能為也天實右序之也故天下莫不信武王之宜君天下也又應之曰天實明昭有周

矣武王之巡守也以慶罰黜陟之典序諸侯之在位者又戢斂其干戈橐韜其弓矢惟求懿美之德陳之於中國既定天下而治道彰著此亦非人之所能為也天實明昭之也故天下莫不信武王之能保天下也既右序之又明昭之是天之子之也○右序有周與明昭有周語意一同明昭不言實承上省文也言天之右序有周而結之以允王維后謂膺天命而無愧也言天之明昭有周而結之以允王保之謂保天

命於無窮也結上文右序及明昭之意皆以允言之

時邁一章十五句

執競祀武王也

執競武王

箋曰執持也競彊也○李氏曰自強之心執而勿失

無競維烈

傳曰無競競也

烈業也○李氏曰觀武王伐紂而得天下拱揖指揮雖彊暴之國莫不趨使一戎衣而天下大定則其功烈為莫強

矣不顯成康

錢氏曰成王業安天下○李氏曰歐陽氏以成康為成王康王有室礙不通者

帝是皇

傳曰皇美也

自彼成康奄有四方

傳曰奄同也○釋文曰盡也

斤

斤其明

斤音靳○傳曰斤斤明察也○李氏曰言照臨四方無所不察也

鍾鼓喤喤

音橫

徐音皇○傳
曰惶惶和也
磬筦將將
筦音管將音鏘○傳曰將將
集也○錢氏曰聲之相應也
降

福穰穰

如羊反○傳曰穰穰衆也

降福簡簡

傳曰簡簡大也

威儀反反

如字○賓

之初筵傳曰
反反重慎也

既醉既飽

錢氏曰主人受嘏既飲福醉飽矣

福祿來反

傳曰

反復也

能執持自強不息之志者武王也故功烈之盛天下
莫強焉豈不顯乎其成王業而安天下也上帝用是
皇美之自武王成王業安天下奄覆四方而有之其
斤斤然明察無所不至言照臨四方也今祀武王之

時鍾鼓喤喤然和磬管將將然集而神之降福穰穰
然衆簡簡然大言樂作而神福之也祭祀之威儀反
反然重謹之祭終飲福醉飽福祿反復未艾言禮行
而神福之也

蘇氏曰凡今所以能備其禮樂脩其祭
祀以受多福者皆武王之德所致也

○箋以鍾鼓磬筦為武王祭廟作樂今不從陳氏以為
祀武王其說為長

執競一章十四句

思文后稷配天也

疏曰國語云周文公之為頌曰思文
后稷克配彼天是此篇周公所自作

與時邁同也。○李氏曰：非其餘詩乃他人所作也。蓋以國語所稱者惟此二詩，知其周公所作，其餘不可得而知之也。古之祭者必以其祖配之，公羊宣公三年云：郊則曷為必祭稷？王者必以其祖配。王者則曷為必以其祖配？自內出者無匹不行，自外至者無主不止。則后稷所以配天，蓋所以尊祖也。○黃氏曰：生民為述事之辭，思文為告神之辭，此雅頌之所以異歟。

思文后稷

朱氏曰：思語辭也。文文德也。○思解見思齊。

克配彼天

曹氏曰：天地能生之。

而不能養之，苟不得其養，則亦弗克遂其生矣。惟后稷能養人，故其功足以配天矣。

立我烝民

疏曰：

存立我天下眾民之命。

莫匪爾極

傳曰：極中也。○曹氏曰：衣食足而後知榮辱倉廩實而後知禮。

節民心罔中，惟爾之中而已。

貽我來牟

箋曰：貽遺也。遺音位。○釋文曰：牟字書作麋，或作麥。○疏文

曰趙岐云麴大麥也廣雅云麴小麥

帝命率育

蘇氏曰率育徧養也

無此疆爾界陳

常于時夏

朱氏曰陳其君臣父子之常道○陳氏曰時夏中國也○李氏曰后稷教民稼穡但養而

已未及教之也如舜命契敬敷五教在寬則教之者乃契之事也思文之詩推美后稷乃以陳常于時夏言者蓋無常產而有常心者惟士為能若民則無常產因無常心放僻邪侈無不為已

后稷人臣而周人推以配天疑於追崇之過此詩發明之言德莫大於文后稷實有文德能配於天非虛尊之也蓋民心莫不有是中而阻飢則失其常心自后稷播時百穀存立衆民之命而後各復其受中之

性是民之中皆是后稷之中也后稷遺我民以來牟
二麥之種此乃天命后稷徧養斯民無此疆界之別
遂使人倫常道得陳於中國也后稷播百穀獨舉來
牟者以其先熟濟民之食尤切也天能予民以中后
稷能全民之中天以徧覆為德后稷則達天之德推
后稷以配天信無慊矣○中者民心所自有特因后
稷有以養之而勿喪耳非后稷以已之中予之而曰
莫匪爾極何也后稷之心與斯民之心同此一中非

二物也斯民既全其中則斯民與后稷同此心亦同此理更無差別民之中即后稷之中故曰莫匪爾極康衢所詠爾極洪範所謂汝極天保所謂爾德君牙所謂惟爾之中其意一也

思文一章八句

詩緝卷三十二

欽定四庫全書薈要卷一千三十三

經部

詩緝卷三十三

宋嚴粲撰

臣工之什

周頌

臣工諸侯助祭遣於廟也

譙郡張氏曰先王深知禮義之本原起於稼穡之際故其

於農事常首先天下之政諸侯助成王祭其歸而戒之以農事者由此故也先王巡守較諸侯之善惡其慶始於土地闢田野治其罰始於土地荒蕪田野不治夫惟戒諸侯之事莫急於新畬之勤制諸侯之賞罰莫先於田野土地之政則夫先王之意槩可見矣

嗟嗟臣工

傳曰嗟嗟勅之也工官也○疏曰嗟而又嗟重數以呼之將勅而嗟歎非訓為勅也不直

戒其身為其太斥。○朱氏曰諸侯之羣臣百工也。○今曰諸侯之臣莫非王臣。敬爾在公。○朱氏曰在

公九公家之事也。王釐爾成。○蘇氏曰賜爾成法也。來咨來茹。○音孺。箋曰咨

嗟嗟保介。○箋曰保介車右也。月令孟春天子親載耒耜。措之於參保介之御間。○疏曰措之於參乘

之人保介之與御者二人間。君之車上止有御者與車右一人而已。今言保介與御明保介即車右也不勅御

人偏勅車右者以御人本主御車不主輔君故專勅明其衛君車也。人君左載御在中央明其遠君措之故繫

於車右因御字單言之以便文。○朱氏曰保介見月令呂覽其說不同然皆為耜田而言。○補傳曰命臣工以

王事命保維莫之春。○莫音暮。○朱氏曰莫春在夏正為建辰之月在周正為建寅之月然

先儒謂商周雖改正朔特以是月為歲首至於朝聘燕享猶用夏正祭用仲月則春祀宜在建卯之月祭畢遣

之時春已向暮農事不可緩也亦又何求曹氏曰言不可捨農事而他求也如何新畬

音餘○釋地曰田二歲曰新田三歲曰畬○釋曰畬和柔之意也○朱氏曰今既莫春矣爾之田事如何哉

於皇來牟於音烏○箋曰皇美也○來牟解見思文將受厥明朱氏曰來牟當夏而且將

受上帝之明賜也明昭上帝迄用康年迄欣之入○錢氏曰迄終也○傳曰康樂也○

今日孟子云樂歲命我衆人王氏曰諸侯之衆莫非王人○錢氏曰衆人庶民也序乃錢

鎛序音耻錢鎛音剪博○傳曰錢鉞也鎛鎛也鉞七造反廣韻音挑鎛音耨乃豆反○疏曰說文云錢鉞古

田器世本云垂作鉞宋仲子注云鉞刈也刈物之器管子云一農之事必有一鉞一鎛一鉞然後成農釋名云

鎛鉞類也世本云垂作耨李巡云鉞也鎛耨當是一器但諸文或以為耨即鉞或云鉞類古器變易未能審之

奄觀銍艾

奄如字鄭音淹銍艾音室又○傳曰銍穫也○說文曰銍穫禾短鎌

諸侯朝正於王因助祭於廟祭終而遣之不直戒其身而戒其臣之共事者以警切之爾諸侯歸其國有王事有民事臣工者諸侯之羣臣百工所與共治其國者也故以王事戒之保戒者車右之士載耒耜以輔君耕耨者也故以民事戒之先嗟歎而戒臣工曰爾臣工與聞國家之政事爾其敬哉歟王賜爾侯國之成法皆一定不易矣其有疑焉當來咨謀茹度於

王朝勿自專以亂章改度也此以尊王之義告之也
又嗟歎而戒保介與聞耕籍今助春祠而還既莫春
矣他又何所求乎唯農事不可緩耳爾國之新田畝
田今如何也二者皆新墾之田用力尤難故首問之
欲其土地闢田野治也於乎美哉來牟二麥夏初即
熟今已莫春將受天之明賜矣夏麥者秋稼之占也
天意昭明終必有年豈可不盡人事以承天意乎爾
歸其國命我衆農夫各具鉋鋤之器以治其田奄忽

之間已觀其用短鎌以艾禾矣此以重農之意告之也

臣工一章十五句

噫嘻

音伊熙

春夏祈穀于上帝也

箋曰祈猶禱也求也月令孟春祈穀于上帝夏

則龍見雩是也雩音餘○疏曰春郊夏雩以禱求膏雨而成其穀實月令仲夏大雩帝以祈穀實是雩為祈穀之明文但雩以龍見為之當在孟夏之月為月令者錯置於仲夏失正雩之月故不引之左傳稱九祀啟蟄而郊龍見而雩郊祀上帝於南郊所以報天德而云祈穀者報其已往又祈其將來襄七年左傳云夫郊祀后稷以祈農事故啟蟄而郊郊而後耕而郊為祈穀之事也月令孟春元日祈穀于上帝是即郊天也後乃擇元辰

天子親載耒耜躬耕
帝籍是郊而後耕

噫嘻成王

王氏曰噫嘻歎辭○曹氏曰所謂吁

既昭假

爾

假音格○朱氏曰昭格上帝○錢氏曰爾語辭

率時農夫

箋曰時是也

播厥百穀

箋曰播猶種也○李氏曰百穀之種非一故總而言之謂之百穀

駿發爾私

駿音峻○箋曰駿疾

也發伐也○傳曰私民田也○疏曰冬官匠人云一耦之伐伐發地故云發伐也言伐者以耜擊伐此地使之發起也言私而不及公令民知

終三十里

箋曰竟三十里者一部一

吏主之周禮云凡治野田夫間有遂遂上有徑十夫有溝溝上有畛百夫有洫洫上有涂千夫有澮澮上有道萬夫有川川上有路計此萬夫之地方三十三里少半里也言三十里者舉其成數○疏曰一夫百畝方百步

積萬夫方之是廣長各百夫以百乘百是萬也既廣長
皆百夫夫有百步三夫為一里則百夫為三十三里餘
百步即三分里之一為少半箋曰服亦服爾耕事也十千維

耦箋曰一川之間萬夫故有萬耦○朱氏曰本以二人並耕為耦今乃萬人畢出而耕也

農事為王道之本故嗟歎而言之我周家以農事開
國致王業之成既昭格于上帝矣今我不敢廢墜前
功將率是農夫以播其百穀令疾發其私田終竟一
部方三十里之地服爾耕事萬夫同時而耕吾民盡
力於田事如此天其念之祈穀之後即躬耕帝藉故

言率時農夫以張本也言駿發爾私不及公田為民
祈也

噫嘻一章八句

振鷺二王之後來助祭也

箋曰二王夏殷也其後杞也宋也○疏曰樂記稱武王伐

紂既下車封夏后氏之後於杞投殷之後於宋史記杞世家云武王克殷求禹之後得東樓公封之於杞以奉夏后氏之祀是杞之初封即為夏之後矣其殷後則初封武庚於殷墟後以叛而誅之更命微子為殷後書序云成王既黜殷命殺武庚命微子啟作微子之命是宋為殷後成王始命之也○曹氏曰必存二代之後者所以尊其先世受命之君俾承祀而不廢且示天下公器不主於一姓使時君常以覆車為鑒兢兢然務脩其德

耳

振鷺于飛

傳曰振振羣飛貌○錢氏曰振自于彼西雝

傳曰雝澤也○箋曰西雝之澤○王氏曰西雝蓋辟我

客戾止

傳曰客二王之後○疏曰諸侯之於天子雖皆有賓客之義但先代之後時王偏所尊敬特謂

之客昭二十五年左傳宋樂大心云我於周為客臯陶謨云虞賓在位此及有誓皆云我客有客之篇以微子為客皆以二王之後特稱賓客也○李氏曰二王亦有

斯容

箋曰興者喻祀宋之君有潔白德來助祭於周之廟得禮之宜也其至止亦有此容蓋威儀之善如

鷺然○曹氏曰鷺之為物羽毛潔白而容止舒閑其譬則脩潔之君子也振者矜持修飾之意我客戾止亦有

斯容則有潔白之德而能文之以禮者也

在彼無惡

烏路反○箋曰在彼謂居其國無怨惡之者○

曹氏曰國人在此無斃

音亦○箋曰在此謂其來朝人皆愛敬之無厭之者○曹氏曰

安其豈弟也

周人惜其將去也○曹氏曰周公居東東方之人欲其留西方之人欲其歸是亦在彼無惡在此無斃之意

庶幾夙夜以永終譽

箋曰永長也

興也振振然羣飛之鷺集於西郊辟雖之澤其羽毛潔白容止舒閑可觀也杞宋之君於周為客皆來助祭於周廟其至此亦有此容也此杞宋之君在彼國無怨惡之者來朝在此人皆無厭之者然猶庶幾其

能夙夜敬戒以長終此美譽愛之以德也

朱氏曰陳氏云在彼

不以其革其命而有惡於我知天命無常惟德是與其心服也在我不以彼墜其命而有厭於彼崇德象賢統承先王忠厚之至也○曹氏曰微子之命云作賓於王家與國咸休永世無窮與以永終譽其戒之一也之意

振鷺一章八句

豐年秋冬報也

李氏曰鄭氏謂報者嘗也烝也蘇黃門謂秋祭四方冬祭八蜡王氏則以謂祭

上帝三說不同鄭氏謂烝嘗者以詩言烝畀祖妣也然載芟祈社稷亦曰烝畀祖妣豈亦祭宗廟乎至於謂秋祭四方冬祭八蜡固是報成百穀之祭不如王氏以為祭上帝○陳氏曰噫嘻祈之於春夏豐年報之於秋冬

是一體之詩也。祈曰上帝而報不言者，省文也。○曹氏曰：秋季大享於明堂，秋祭四方，冬祭八蜡，天地百神無所不報，而同歌是詩，故不言其所祭耳。

豐年多黍多稌

音杜。傳曰：豐大也。稌，稻也。○箋曰：豐年大有年也。○稌，稻。鮮見唐鵠羽。○李

氏曰：天官食醫云：牛宜稌，鄭司農注云：稌也。王氏以為豐年之時，或高燥而寒，或下濕而暑，無所不熟，故所以謂豐職。方氏謂雍冀之地高燥，其穀宜黍、荊、揚之地下濕，其穀宜稌。是黍利高燥，稌利下濕也。黍稌無所不熟。

亦有高廩

音凜。○釋文曰：廩，倉也。○傳曰：廩所以藏盛之。○穰，○疏曰：禹貢百里賦納總，即禾稼也。

二百里。銓即穗也。此言藏穗則廩唯藏粟也。而地官廩人註云：藏米曰廩者，對則藏米曰廩，藏粟曰倉。其散即通。萬億及秭。
音姊。○傳曰：數萬至萬曰億，數億至億曰秭。○箋曰：以言穀數多。
為酒為

醴

音禮○曹氏曰酒正辨三酒之物惟清酒以供祭祀鄭氏以謂中山冬釀接夏而成者又辨五齊之物惟

醴酒最濁鄭謂成而汁滓相

將如今之甜酒也齊音劑

烝畀祖妣音匕○箋曰烝進也畀予也○

詩記曰周以后稷為祖以姜嫄為妣然

祭祀則無所不在也故總以祖妣言之

以洽百禮鮮見

初降福孔皆

傳曰皆徧也

黍宜高燥而寒稌宜下濕而暑大有之年黍稌皆熟

則百穀無不熟矣亦有高大之倉廩其中穀數之多

有萬與億及秭也有此黍稷以之為酒又以之為五

齊之醴齊進於先祖先妣而祭祀所以會合其事神

之衆禮百物皆所以為禮而行禮以酒為主也豐年故有此是上帝之降福無所不徧也敢忘報乎

豐年一章七句

有瞽音古始作樂而合乎祖也

箋曰合者大合諸樂而奏之。○疏曰周公攝政六年

制禮作樂合諸樂器於太祖之廟奏之經皆言合諸樂器奏之事也言合於太祖則特告太祖不因祭祀且不告餘廟以樂初成故於最尊之廟奏之耳此太祖謂文王也毛以為始作大武之樂。○曹氏曰周人祖文王而宗武王則祖者文王之廟也

有瞽有瞽

傳曰瞽樂官也。○箋曰瞽矇也以為樂官者目無所見於聲音審也周禮上瞽四十人中

瞽百人下瞽百六十人
有眡瞭者相之瞭音了

在周之庭

疏曰周之廟庭**設業設虞**
音巨

○疏曰皆眡瞭設
之業虞解見靈臺

崇牙樹羽

傳曰崇牙上飾卷然可以
縣也樹羽置羽也卷音權

○崇牙解見靈臺維樅○疏曰置羽者置之於拘虞之
上角漢禮器制度云為龍頭及頷口銜壁壁下有旄牛

尾明堂位於崇牙之下又云周之壁翬註云周人畫
繒為翬載以壁垂五采羽其下樹翬於簀之角上

應

田縣鼓

縣胡涓反○傳曰應小鞀也田大鼓也縣周鼓
也鞀音皮疏曰釋樂云大鼓謂之鼗小鼓謂之

應大射禮應鞀在建鼓東則為應和建鼓也應鞀其文
是為一器其鼓懸之虞業明堂位云夏后氏之足鼓殷

人楹鼓周人縣鼓
鞀磬祝圀

鞀音桃祝音蓄圀音禦○
傳曰鞀小鼓祝木控也圀

是周法鼓始在縣
揭也控音控揭苦贍反○疏曰春官小師注鞀如鼓而
小持其柄搖之旁耳還自擊書益稷云合止祝敔注云

祝狀如漆甯中有椎投椎於其中而撞之狀狀如
既備
伏虎背上刻之所以止鼓○朱氏曰磬石磬也

乃奏

疏曰皆設之於庭宇既備具乃使瞽人擊而奏之

簫管備舉

箋曰簫編小竹管如今賣

錫者所吹也管如筴併而吹之錫夕清反乾糖也筴字
又作笛疏曰管謂並吹兩管也○王氏曰簫也管也尤
其器之小者言其
小所以為備也
嗶嗶厥聲
嗶音橫又音黃○執肅雝

和鳴先祖是聽我客戾止

箋曰我客二王之後也○疏曰助祭之人多矣以二王之

後尊故特言之永觀厥成

朱氏曰成樂闋也如簫韶九成之成○李氏曰成猶終也徧更而奏焉故

謂之成

重言有此瞽人者非一人也其瞽人皆在周之廟庭

矣乃使眡瞭為之設其垂鍾鼓之具其以板加於柎
上者業也其植者虞也其業之上齒刻為崇牙也其
柎虞之上角有置羽之飾也又有應之小鼓田之大
鼓其鼓皆縣之虞業也又有持其柄而搖之者鞀鼓
也又有石磬也有起樂之祝也有止樂之圉也設之
備具乃使瞽人擊而奏之也又有編竹之簫併竹之
管已備舉作之也樂聲喤喤然和皆恭敬和諧而鳴
不相奪倫先祖之神於是降而聽之於時我客至止

永觀我樂闋之成以先代之後來觀樂為盛事也

有瞽一章十三句

潛季冬薦魚春獻鮪也

箋曰冬魚之性定春鮪新來薦獻之者謂於宗廟○疏曰冬言

季冬春亦季春也月令季春薦鮪于寢廟天官漁人春獻王鮪冬言薦春云獻者皆謂子孫獻進於先祖其義一也冬則衆魚皆可薦故總稱魚春唯獻鮪而已故特言鮪冬寒魚不行孕性定而肥充月令季冬乃命漁師始漁天子親往乃嘗魚先薦寢廟言春鮪新來者陸璣云河南鞏縣東北崖上山腹有穴舊說云此穴與江湖通鮪從此穴而來北入

河西上龍門入漆沮

猗與漆沮

音醫余七趨○邶傳曰猗嘆辭○今日與辭也○箋云猗與嘆美之辭猶言美哉也○傳

曰漆沮岐周之二水也。○疏曰漆沮自豳歷岐周以至豐鎬以其薦獻所取不宜遠於京邑故不言豳言岐周者鎬京去岐不遠故繫而言。○漆沮有考見縣正解。潜有多魚。王氏曰潜言取之深也。○李氏

曰王氏以為潜藏之潜故言取之深也。○解頤新語曰魚喜潜。○今考傳云潜摻也。什文云魚之所息謂之摻

而取之也。今不從摻素感反摻疏蔭反。有鱸有鮪。鱸音

音委。○鱸鮪條嘗。鮪里。○音條嘗偃里。○箋曰鮪白鮪也。鮮並見。碩人。鮪鮪魚。○山陰陸氏曰鮪形狹而長若

條然魚性浮似鱮而白。以享以祀以介景福。

歎美此漆沮岐周之二水於其深潜之處有此多魚

有鱸有鮪有似鮪之鮪有鮪揚有似鮪之鮪有

三十六鱗之鯉我取之以獻享以祭祀而神明饗之
助以大福也言魚以見萬物衆多猶魚麗也魚麗當
文武之時頌聲未作故云可以告神而已潛則告神
之樂歌也

潛一章六句

雝禘大祖也

禘音第大音泰○箋曰禘大祭也大於四時而小於禘○李氏曰鄭氏以為大於四

時其說固是以為小於禘則非矣禘之祭則大於禘天子之祭有禘有祫有四時之祭諸侯之祭則有祫有四時之祭至於郊禘則非所當講也按春秋書大事於太廟大事者必祫也有事於太廟有事者必四時之祭也

裕於太廟不言裕而謂之大事四時之祭不斥其名而曰有事言諸侯之事也郊禘非諸侯之祭故斥其名以見其僭也觀此則禘大於裕可知矣○劉氏曰先王重宗廟之享為踈數之制春祠夏禴秋嘗冬烝四時之祭厚矣以為未也於是有三年之裕祭未毀廟之主皆升合食於太祖祭之所及可謂衆也又以為未也於是有五年之禘祭審諦昭穆以及其祖之所自出祭之所及可謂遠矣○陳氏曰周之太祖則后稷也禘其祖之所自出者若稷之所自出者嚳於周無廟故禘於太祖之廟又遷群廟之主以配之若裕則既遷之主皆得合食於太祖之廟焉禘裕之義如斯而已○朱氏曰祭法周人禘嚳周之太祖即后稷也禘嚳於其廟以后稷配所謂禘其祖之所自出以其祖配之是也

有來雖雖

箋曰雖和也

至止肅肅

箋曰肅敬也

相維辟公

相去聲辟音璧

○傳曰相助也。辟公解見烈文。

天子穆穆

穆穆解見文王。王曰穆穆敬和也。

於薦

廣牡

於鄭如字王音烏。箋曰薦進也。○傳曰廣大也。○王氏曰廣牡碩大肥腴之謂也。

相予肆

祀

朱氏曰肆陳也。

假哉皇考

假如字毛音暇。○蘇氏曰假大也。○箋曰皇考斥文王也。

綏予

孝子宣哲維人

朱氏曰宣通也哲知也。

文武維后

蘇氏曰大哉皇考之安我也其

臣宣哲其君文武

燕及皇天

傳曰燕安也。○朱氏曰安人以及於天。

克昌厥後

箋曰

昌大也。○蘇氏曰周人以諱事神文王名昌而此曰克昌厥後何也曰周之所諱不以其名號之耳不遂廢其文也諱其名而廢其文者周禮之末失也。○李氏曰周人所謂以諱事神者如稱文王則不斥曰文王昌如此而已書之所稱惟有道曾孫周王發但曰元孫某史官不敢斥其名故也如穆王名滿而當時亦有王孫滿襄

王名鄭而當時亦有衛侯鄭魯武公名敖而後世之臣
有公孫敖觀此則知此詩言克昌厥後噫嘻之詩言駿
發爾私昌文王之名也發武王之名也皆未嘗諱孔子
作春秋如匡王名班而春秋亦書曹伯班簡王名夷而
春秋亦書晉侯夷吾皆未嘗為之諱綏我眉壽介以繁祉箋曰繁既右烈

考

傳曰烈考武王也○疏曰洛誥云烈考武王弘朕恭

亦右文母

傳曰文母太姒也

有從彼國而來雖雖然和既至於此肅肅然敬者是
助祭之君公諸侯也是時天子之容穆穆然敬而和
於我薦進大牡牲之時其辟公助我肆陳祭祀之饌
言得天下之歡心以奉其先王也此由先王之德使

然於是贊美大哉皇考文王綏安於孝子以已成之
業其臣宣通明哲其君有文武之德故能安人以及
於天昌大其子孫而安祐於我使得秀眉之壽助以
繁多之福也此又見右助於光烈之考武王及見右
助於有文德之母太姒故也。古註以皇考為文王
烈考為武王朱氏從之王氏以皇考為武王烈考為
文王詩記從之李氏則以皇考烈考皆稱其祖三說
不同今考祭法父曰考祖曰王考曾祖曰皇考高祖

曰顯考此說天子諸侯大夫廟制其實考者祖父之通稱也康誥云丕顯考文王酒誥云穆考文王顯考穆考皆明稱文王也洛誥既明稱烈考武王載見始見乎武王廟而言率見昭考則烈考昭考皆稱武王也武王無競維烈故稱烈考猶商稱湯為烈祖文王當穆故武王當昭也唯皇考通稱文王武王此詩後稱烈考為武王則皇考稱文王矣閔予小子言皇考能念皇祖訪落言皇考能紹文王之直道則皇考又

皆稱武王矣

雖一章十六句

載見

賢之去

諸侯始見乎武王廟也

載見辟王

傳曰載始也。王初即政也。

補傳曰諸侯始見謂成王也。

曰求

厥章

宋氏曰章法度也。始見則欲求其法度而謹守之。

龍旂陽陽

龍旂

出車

曹氏曰陽陽色之。

和鈴央央

於良反徐音英。傳曰和在軾前鈴。

鮮明也。

今日我朱孔陽。在旂上。疏曰和亦鈴也。釋天云有鈴曰旂。郭璞云懸鈴於竿頭央央然有音聲。曹氏曰臧哀伯云錫鸞和。

鈴昭其聲也。

杜預云鸞在鑣和在衡鈴在旂動皆有聲。然此乃田車耳若乘車則鸞在衡和在軾錫音揚馬面。

當**條革有鷁**

條音條鷁音鏘○條革鮮見蓼蕭○箋曰鷁金飾貌

休有烈光

朱氏曰休

美也○李氏曰烈大也

率見昭考

昭如字○訪落箋曰昭明也○朱氏曰廟制太祖居中左昭右

穆周廟文王當穆武王當昭故書稱穆考文王而此詩及訪落皆謂武王為昭考也○今考小宗伯辨廟祧之

昭穆古註昭音韶朱氏中庸章句如字

以孝以享

傳曰享獻也

以介眉壽永言

保之思皇多祐

李氏曰與思皇多士同思語辭也皇美也

烈文辟公

鮮見烈文詩

綏以多福俾緝熙于純嘏

箋曰純大也

諸侯始見成王以其初即政欲求法度以歸而遵守

之也其所建交龍之旂陽陽然鮮明其軾前之和與

旂上之鈴央央然有音聲其轡首鷩然以金為飾其
來朝之車服如此見成王得萬國之驩心為國之光
華故休美而有光也成王於是率之以見昭考武
王以致其孝敬以行其獻享以助我受福而得秀眉
之壽長保享之美哉多福如此皆爾有功有德之諸
侯以時助祭而致之是安我以多福使之緝續熙廣
于大福也

載見一章十四句

有客微子來見祖廟也

見賢之去○曹氏曰微子啟紂之諸兄封於微而爵為子微蓋

商畿內國名○疏曰不言所祭之名不指所在之廟無得而知之也

有客有客

疏曰客止一人而重言有客有客是丁寧殊異以尊大之也○李氏曰按左傳云宋先代

之後於周為客亦白其馬

李氏曰商人尚白故微子來朝而乘白馬檀弓云殷人戎事乘翰翰白色

馬也以戎事乘之則微子亦乘白馬也文王之詩云殷士膚敏裸將于京厥作裸將常服黼吁則是殷人助祭所服之冠也微子助祭故亦乘其白馬蓋其一代之所尚雖已易代矣而其臣尤服其冠乘其馬也翰平去二

音有妻有且

妻音妻且音取○傳曰妻且敬慎貌

敦琢其旅

敦音堆徐又音彫琢音卓

○曹氏曰旅微子之卿大夫也

有客宿宿

傳曰一宿曰宿

有客信信

傳曰再宿曰信言

授之繫

音執。傳曰欲執其馬而留之。箋曰繫絆也。絆音半。

以繫其馬薄言追

之

箋曰追送也。疏曰餞送之。

左右綏之

箋曰左右之臣又欲從而安樂之。厚之無已。疏曰

與之驩燕以安樂其心

既有淫威

補傳曰天道福善禍淫王者體天而行賞罰使淫人懼焉善人

勸降福孔夷

傳曰夷易也易音異。什邡張氏曰自管蔡以武庚祿父叛周公誅之故於微子之

來見也則告之曰昔者既有淫威矣而今也降福孔夷蓋逆順之理如此凡吾之威福非苟而已也

微子殷代之後於周為客重言有客者喜之也仍殷

之舊秉其所尚白色之馬見不純臣之也又威儀萋

萋且且然敬謹者乃其隨行之衆如敦琢之金玉然

稱其衆臣之有文則其主之賢可見猶杜詩云侍立
小童清也微子宿而又宿信而又信樂其留之久也
授之繫絆以繫其馬懼其去之速也蓋至於行有日
矣又餞送之左右之臣相與飲酒以安樂之殷勤無
已也昔紂武庚為亂我周既有罰淫之威今錫福於
微子則又甚易而不吝此以見微子之賢而且示吾
之威福一出於公也○今考棫樸傳云追雕也金曰
雕玉曰琢箋引周禮追師掌追衡筭則追亦治玉與

毛異義追敦同音則此敦琢毛亦分金玉矣以敦琢併為治玉自是箋義非傳意也

有客一章十二句

武奏大武也

疏曰謂周公攝政六年之時象武王伐紂之事作大武之樂既成而於廟奏之經之

所陳皆武王生時之功也明堂位云周公攝政六年制禮作樂以武王用武除暴為天下所樂故謂其樂為武樂○朱氏曰春秋傳以此為大武之首章也

於皇武王

於音烏○蘇氏曰皇大也

無競維烈

傳曰烈業也

允文文王克

開厥後嗣武受之

錢氏曰嗣武繼之以武

勝殷遏劉

箋曰遏止也○傳曰劉殺

也
耆定爾功

耆毛音指鄭音其○傳曰耆致也
箋曰耆老也年老乃定女之初功

武王以武功定天下故樂名大武此武頌大武之樂
章發明武王之功言於乎大哉武王有莫彊之功烈
也信乎文王有文德以開其後人之基緒矣然殷虐
未除則文王之文德未能盡達於天下故必得武王
繼之以武而受之伐紂以止殺然後致定其功所以
歸重武王之功明非武王之武無以成文王之文也
武頌言文王之德不可無武王之功為奏大武而言

之維清言周之成功皆本於文王之德為奏象舞而
言之各有攸當也

武一章七句

詩緝卷三十三

謹案卷三十一第三頁後八行當以采絲為之刊

本絲訛綏據毛詩疏改

第八頁後五行韓侯先祖刊本侯訛先據毛詩箋
改

第二十一頁後四行江漢以喻盛大也刊本大訛
人據毛詩箋改

卷三十二第八頁前五行欲其兢兢刊本欲其訛
其欲今改


第九頁前一行彼徂矣案注疏及朱子集傳俱作
彼徂矣岐為句與此異

第九頁後三行成功告神之頌刊本功訛公今改
卷三十三第二頁前七行宋仲子注云刊本宋訛
朱又釋名云刊本名訛文據毛詩疏及釋名改
第四頁前五行伐發地刊本發訛法據毛詩疏改
第七頁前七行則廩惟藏粟也刊本則訛即據毛
詩疏改

第八頁前五行言合於太祖刊本合訛告據毛詩

疏改





總校官庶吉士臣侍朝

校對官中書臣潘奕雋

謄錄監生臣牟焜

欽定四庫全書薈要

經部

詩緝卷三十四至

六

詳校官原任侍講臣王燕緒



欽定四庫全書薈要卷一千三十四

經部

詩緝卷三十四

宋嚴粲撰

閔予小子之什 周頌

閔予小子嗣王朝於廟也

朝音潮。箋曰：嗣王謂成王也。除武王之喪，將始即政朝。

閔予小子

箋曰：閔，悼傷之言也。○李氏曰：左傳云：寡君少遭閔凶，予不能文，是閔者居喪之稱。○曹

氏曰：曲禮云：天子未除喪，曰予小子。然洛誥云：予小子其退，即辟于周。蓋成王常以冲幼自處，故每稱之耳。

遭家不造

箋曰：造，猶成也。○李氏曰：王嬖，音氏，以為武王天下未集而終。嬖，音

嬖，音

李氏曰此嫫與哀此梵獨之義同嫫嫫者孤獨也左氏亦有在疚之文亦是居喪之稱也王雖朝於廟然去喪未甚遠故猶以死喪之辭為言○傳曰疚病也於乎皇考於乎音烏呼○箋曰皇考武王也永

世克孝

蘇氏曰終身能孝

念茲皇祖

箋曰皇祖文王也

陟降庭止

箋曰陟降

上下也○傳曰庭直也○張子曰周道如砥其直如矢聖人之心至平至直不難行人自多邪曲耳○李氏曰文王俯仰之間皆盡其直道文王之詩云文王陟降在帝左右文王之心俯仰無間無有愧怍洋洋乎如其上如在其左右而武王之所以繼志述事者亦本於此易曰敬以直內能敬則莫不直矣○補傳曰止語辭維予小子夙夜敬止於乎皇王錢氏曰皇王武王也○今曰文王有聲稱文王

曰王后武繼序思不忘

傳曰序緒也○疏曰以世世相繼如絲之端緒故轉為緒

成王除喪朝廟感傷而言曰可悼閔乎我小子耳遭
武王崩家道未成嬛嬛然孤特在憂病之中未知攸
濟也於是述武王繼文王之事於乎可歎美者我皇
考武王終身能孝能念我皇祖文王一陟一降直而
無私此武王之所以為孝也直者純乎天理之公也
令我小子當早起夜臥敬謹而行之於乎可歎美者
我皇王武王也我繼其序思其所行不敢忘也以武
王能念文王則我當不忘武王也○說者以陟降庭

止為若見文王陟降於庭然下篇紹庭上下其義難
通大田既庭且碩韓奕榦不庭方周官四征弗庭庭
古注皆訓為直庭之為直見於經多矣不必易也

閔予小子一章十一句

訪落嗣王謀於廟也

箋曰謀者謀政事也

訪予落止

傳曰訪謀也落始也○朱氏曰訪問也○曹氏曰凡宮室始成則落之故以落為始君子

以作事謀始始之不謀其終能無違者鮮矣

率時昭考

傳曰率循也○箋曰昭明也○疏曰昭考

武王也○朱解見載見

於乎悠哉

於乎音烏呼○傳曰悠遠也

朕未有艾

音礙徐音

判○釋詁曰艾歷也

將予就之

曹氏曰將扶將也○今日無將大車箋云將猶扶進也

繼猶

判渙

音喚○傳曰猶道也判分也渙散也

維予小子未堪家多難

如字協韻去聲

紹庭上下

箋曰紹繼也○疏曰武王能繼文王以直道施於上下

陟降厥家

朱氏曰家

猶言國也

休矣皇考

箋曰休美也皇考武王也

以保明其身

朱氏曰保安也明顯也○

王氏曰保其身無危亡之憂明其身無昏塞之患

成王始即王位恐不能繼聖父之業故於廟中與羣

臣謀之言我謀訪始初之法在率循我明德之考武

王固也然所歎者昭考之道悠遠而不可及予幼稚

未有所歷爾羣臣幸扶將我以就之尚恐繼其道而
判渙不合也又自言予幼稚小子未堪王室之多難
其能紹文王之直道施於上下俯仰於家未嘗少離
者唯美哉皇考武王能以此保明其身也

李氏曰仰先王之盛

德數眇躬之涼薄苦前哲之高遠也○曾氏曰雖不言繼序思不忘然歎美皇考則此意在其中矣

訪落一章十二句

敬之羣臣進戒嗣王也

陳氏曰嗣王於祭之明日繹賓尸而羣臣與焉既作謀政之詩

以發羣臣之志而作頌者又設羣臣進戒之詩以答之又形容嗣王虛心求言之意為羣臣者當何如哉

敬之敬之天維顯思

李氏曰天之道甚顯善則福之淫則禍之載者培之傾者覆之未有

善而不獲福也未有惡而不獲禍也天之道顯○朱子曰思語辭也

命不易哉

易毛音異鄭音亦○

李氏曰惟天有顯道故其命靡常此命所以為不易也

無曰高高在上陟降厥士

傳曰士事也

日監在茲

箋曰監視也

維予小子不聰敬止

解頤新語曰不

聞敬天之道也

日就月將

朱氏曰將進○箋曰日就月將言當習之以積漸也

學有緝熙

于光明

王氏曰緝續也熙廣也

佛時仔肩

佛毛如字鄭音弼仔音茲○箋曰弗輔也時是

也仔肩任也

示我顯德行

去聲

作頌者設為羣臣進戒之辭曰敬之哉敬之哉敬而

又敬勉之以誠之不已也天道甚明禍福不爽故予
奪靡常其命不易保也無謂其高高在上遠人而不
吾察也王一陟一降之事天無日而不監視于此無
微不顯所以不可不敬也於是又設為成王答之之
辭曰維我小子未聞敬之之道謂羣臣所言當敬之
事乃天人精微之理今聞所未聞也所願學焉庶幾
日有所成月有所進習之以漸緝續熙廣以至於其
道光明我負荷天下其任甚重爾羣臣當輔佛我此

任有以正救之無為面從容悅必示我以顯然之德
行使我有所則效也○輔謂之佛者言正救其失不
專順從之也學記云其求之也佛佛不順也猶孟子
所謂法家佛士也仔肩為負荷之意故為任生民是
任是負黍苗我任我輦皆謂肩任之也或以士為人
材然勿士行枚只得訓事古訓不可廢也

敬之一章十二句

小處音嗣王求助也

箋曰天下之事當謹其小小時不
謹後為禍大故成王求忠臣早輔

助已為政
以救患難

予其懲

箋曰懲艾也艾音刈

而必後患

傳曰必慎也

莫予荍蜂

荍今音烹舊音

傳○王氏曰荍使也蜂善辛螫○曹氏曰成王之過辛

螫也豈有使蜂螫之哉實自求之而已○今日抑莫予

云觀莫無也柔柔荍云不連毛云荍使也普耕反音烹

徐蒲耕反音餅也洛語伴來以圖及獻上音義同今毛

以荍蜂之荍為厚或孫炎云謂相掣曳之於惡故音傳

今從王氏荍蜂為使蜂當音烹說文傳使也則荍讀作

傳亦可也厚

自求辛螫

音釋○疏曰辛苦毒螫也

肇允彼桃蟲拚飛

音翅尺制反

維鳥

拚音藩○箋曰肇始也允信也○傳曰桃蟲鷦也鳥之始小終大者鷦音焦○釋鳥曰桃蟲鷦其雌

鷦鷦音艾○郭璞曰鷦鷦桃雀也俗名為巧婦鷦鷦小

鳥而生鷦鷦者也鷦音苗○陸璣疏曰今鷦鷦是也微

小於黃雀其雛化而為鵯故俗語鵯鵯生鵯○山陰陸氏曰說苑云鵯鵯巢於葦苔繫之以髮鳩性拙鵯性巧故鵯俗呼巧婦一名工雀一名女匠其喙尖利如鉗取茅秀為巢巢至精密以麻紩之如刺鐵然故一名鐵雀其化輒為鵯鵯紩音秩鵯紩也○錢氏曰拊與胡同○張氏曰猶言初為鼠後為虎不必謂桃蟲化為鳥也○今曰此與舊說異姑兼存之

未堪家多難

傳曰堪任也

予又集于蓼

音了○蓼

曰集會也○疏曰集會謂逢遇之也○傳曰集于蓼言辛苦也○朱氏曰蓼辛苦之物也○錢氏曰蓼味辛而苦

成王即政而求助於賢臣曰予其懲創於往時而畏謹後患矣捐管蔡之事也人近蜂則被其螫信小人

則受其惑蜂不可使前日之事無人使蜂螫我乃我自取其辛螫也我今始信桃蟲之微能翻飛為鳥言小物之能成大不敢不誌也予未堪王室多難又會遇于辛苦之地爾羣臣可不助我乎○莫予荇蜂猶云莫予毒也已古文莫予莫我之類皆倒提予我字以便文耳莫我肯德言無肯德於我莫予荇蜂言無荇蜂於我其他如莫我知莫予云觀之類皆倒辭也

小誌一章八句

載芟音春藉田而祈社稷也

芟曰藉田甸師氏所掌王載耒耜所耕之田天子千

畝諸侯百畝藉之言借也借民力治之故謂之藉田○

疏曰月令孟春天子躬耕帝藉天子祈社稷以仲春與

耕藉異月而連言之者雖則異月俱在春時故以春總

之祭法云王為羣姓立社曰泰社王自為立社曰王社

此二社皆應以春祀之但此為百姓所祭文當

主於泰社其稷與社共祭亦當為太社社稷焉

載芟載柞

音窄○芟曰載始也○傳曰除草曰芟除木曰柞○疏曰隱六年左傳云如農夫之務去

草焉芟夷蘊崇之是除草曰芟秋官柞氏掌攻草木及

林麓是除木曰柞○曹氏曰秋官雉氏掌殺草秋繩而

芟之除草木是初墾闢而為田者也雉音

其耕澤澤

音

替繩音孕注合實曰繩芟其繩則實不成

○釋文曰耕犁也○芟曰澤澤然解散○曹氏曰

千耦

草木之根既去而後耕之土則澤澤然解散矣

其芸

耦音偶芸音云本又作耘○今曰長沮桀溺耦而耕謂二人為耦而並耕此千耦其耘亦謂千人為

耦而並耘與十千維耦同○釋文曰芸除草也○曹氏曰反土之後草木根株有芟柞所不盡者則復耘之其

多至于千耦也徂隰徂畛音軫○今曰下濕曰隰○疏曰地官遂人云十夫有溝溝上有畛侯

主侯伯

疏曰侯維也○傳曰主家長也伯長子也

侯亞侯旅

傳曰亞仲叔也旅子弟也

侯

彊侯以

箋曰彊有餘力者地官遂人云以彊予任毗以謂閭民今時傭賃也予音與毗音眠○疏曰謂

其人彊壯治一夫之田仍有餘力能佐助他事者也太宰以九職任萬民其九曰閭民無常職轉移執事鄭司

農云閭民謂無事業者轉移為人執事若今時傭力也僖二十六年左傳云凡師能左右之曰以有

其饁

貪音醺他感反饁音葉○李氏曰貪衆人飲食聲○箋曰饁饋饒也饒亦作餉式亮反

思媚

其婦

錢氏曰忠語助也

有依其士

今日依就也。曹氏曰士不辭耕稼之勞而知

愛其婦婦不憚饑餉之煩而知依其士有和樂之風焉

有畧其邦

音似。傳曰畧利也。曹氏曰

利則入土也深倣載南畝

倣音蠲。倣解見七月

播厥百穀

箋曰播猶

種也。曹氏曰百穀之性其寒暑濕燥高下早晚各有所宜而水旱豐凶不可豫料故迭種之所以為備也

實函斯活

函音含。箋曰實種子也函含也活生也其種子皆含生氣

驛驛其達

驛音

亦。蘇氏曰驛驛苗生貌。箋曰達出地也

有厭其傑

厭去聲下同。王氏曰厭受氣澤厭足也

○箋曰傑先長者長音掌。疏曰苗之傑也

厭厭其苗

箋曰厭厭其苗衆齊等也。錢氏曰積疊

之貌苗齊等動搖厭厭然若積疊之

緜緜其庶

音標表驕反。傳曰庶芸也。疏曰孫炎云緜緜言

詳密也。○王氏曰：前曰「干耦其芸則既耕而芸」，今曰「繇繇其應則既苗而芸」，則以繇繇為善，恐傷

苗也。載獲濟濟，獲音獲。○朱氏曰：濟濟，人衆也。○曹氏曰：衆而整也。有實其積，又音恣，如

字。○箋曰：有實，實成也。今曰「上言實，而斯活此言有實其積，皆以實為穀實」。萬億及秭，音姊，為

酒為醴，烝畀祖妣，以洽百禮。見豐年，有飴其香，離音

之別。○傳曰：飴，芬香也。○詩邦家之光，有椒其馨。曹氏曰：飴，

故曰：飴香也。謂酒之氣也。椒，皆酒醴芬芳之氣。○疏曰：椒是木名，非香氣也。但椒

木氣香，作者以椒言香。○詩故曰：椒之氣烈，故古者謂椒酒取其香且烈也。○補傳胡考之寧，傳曰：胡壽也。考

曰：楚辭云：奠桂酒兮椒漿。胡考者，老人也。士冠禮祝云：永享胡考。注云：胡遐也。○

疏曰：僖二十三年左傳云：雖及胡考，周書謚法保民耆

艾曰胡胡考老而有成德也解頤新語曰說文云胡生
領垂也又老狼亦垂胡令老者或有此狀故詩人取之

匪且有且

如字又咀之平
○傳曰且此也

匪今斯今振古如茲

傳曰振
自也○

朱氏曰猶言

自古有年也

此祈社稷之詩言人事已盡神其念之芟柞草木是
新墾闢之田專言新墾闢之田者其用力尤難故也
始芟以除其草始柞以除其木草木之根既去然後
耕犁之其土氣烝達釋釋然解散矣既耕犁以反其
土猶有草木根株芟柞所不盡者又千人為耦而芸

以去之耦以言並作千以言其多或往下濕之隰或
往溝上之畛言耕夫遍于原野無曠土也其往者何
人乎維主則家長也維伯則長子也維亞則仲叔也
維旅則衆子弟也維彊則借助之彊壯也維以則傭
雇之閒民也言衆力競勸無游民也當饁餉之時有
噍然衆人飲食之聲其耕夫則愛其婦其饁婦則就
其夫夫耕婦饁驩然相愛見治世和樂之氣象焉有
畧然剡利之耜始有事於南畝而耕之前言其耕澤

澤謂轉新墾之土此言倣載而耕之謂始耕而將種也前所耕猶荒地今所耕乃成田故稱南畝也百穀皆播種之其種子曰實皆含生氣驛驛然而生出土而條達乃有厭然受氣澤厭足者是先長傑特之苗也厭厭然齊等者是其衆苗也既苗則又緜緜然詳密而芸之不詳密則傷苗也芟芸廡皆除草也芟與柞並言是新闢為田先除其地上之草木也既耕而言芸是反土之後除其土中之草木根株也既苗而

言庶是除其苗間之草也至於成熟則穫刈之濟濟然其人之衆其穀實皆積聚之其數之多有萬與億而及秭也及以為酒以為五齊之醴齊進予先祖先妣而祭祀所以會合其事神之衆禮衆物皆所以為禮而行禮以酒為主也此酒醴有飴然之香氣以饗賓客則時和禮備而為邦家之光有如椒之馨以養耆老則老人之安寧以上皆秋冬豐熟之事而春祭言之蓋以此祈於神也又言非特此方有此豐年也

非特今方有今豐年也自古以來皆如此言神之降

康久矣繼此以往願其勿替也

李氏曰噫嘻豐年其說為畧載芟良耜其

說為詳蓋祈上帝所以尊之也故其辭畧祭社稷所以親之也故其辭詳

載芟一章三十一句

良耜

音似

秋報社稷也

疏曰經言百室盈止婦子寧止乃是場功畢入當十月之後而專言

秋報也者作者先陳人事使畢然後言其報祭其實報祭在秋寧止在冬也

芟芟良耜

芟音測。曰芟芟猶測測也。疏曰芟芟是月利之狀。舍人曰芟芟耜入地之貌。芟

曰良善也。招解見七月。

倣載南畝播厥百穀實函斯活

三句並解見載芟

或來瞻女

音汝。箋曰：瞻，視也。有來視女，謂婦子來饋者也。○錢氏曰：視猶省也。

載筐及

筐

筐，音巨舉。○箋曰：筐，音所以盛黍也。

其饌伊黍

饌，音餉。○箋曰：豐年之時，雖賤者猶食黍。

○疏曰：案少牢，特牲大夫士之祭，禮食有黍，明黍是貴也。玉藻云：子卯稷食，菜羹為忘日，貶而用稷者為賤也。

賤者當其笠伊糾

音九。○傳曰：笠，所以禦暑雨也。○補傳曰：糾，繚也。所以繩繚而成也。○錢

氏曰：其緣糾結

其縛斯趙

縛，音博。趙，迨之上。蜀又如字。○傳曰：趙，刺也。

以嫫

荼蓼

音蒿徒了。○說文曰：嫫，拔田草也。○疏曰：蓼是穢草，荼亦穢草，非苦菜也。釋草云：荼，委菜。王肅云：荼

陸穢，蓼水穢，然則所由田有原有隰，故並舉水陸穢草。○三荼考見邶谷風。○箋曰：饌者，見載糾然之笠以田

器刺地，嫫去荼蓼之事。言閔其勤苦刺七亦反。

荼蓼朽止，黍稷茂止，穫之挈挈。

音室。○傳曰：推推穫聲也。

積之粟粟

積音志。○今曰：聘義言王云：鎮密以粟注云：粟堅貌是粟粟為

堅實之貌。

其崇如墉

箋曰：崇高大也。○傳曰：墉城也。

其比如櫛

比音備。櫛側反。○箋曰：

比，迫也。○說文曰：櫛，梳篦總名。○疏曰：其比，迫如櫛齒之相次。○朱氏曰：理髮器言密也。

以開百室

箋曰：一族同時納穀。○疏曰：地官大司徒五家為比，五比為閭，四閭為族，是百室為一族於六

遂則一鄭遂人云：百夫有洫，故知百室共洫間而耕。鄭

音纂。○曹氏曰：百室在六鄉為族，而族師掌以歲時校

登其夫家之衆寡，在六遂為鄭長掌趣其耕耨，與其戒

令政事莫不同之，故使之同時納穀，所以示親睦均，有

無也。趨

百室盈止，婦子寧止，殺時犇，壯

犇，閭之平。○傳曰：黃牛黑唇曰

音促。

犇。○疏曰：地官牧人云：凡陰祀用熟牲毛之注云：陰祀

祭地北郊及社稷也。然則社稷用熟牛，今用黃者，蓋正

禮用黝至於報功以社是土神故用黃色仍用黑唇也
○曹氏曰古之人享其成必思其所自以為百室盈而
婦子寧者社稷之功故於是而報焉地之色以黑為正
以黃為美故陰祀用黝牲正其義也社稷用稯美其功
也○黃氏曰載變言以洽百禮者願其豐年之慶而百
神之祀皆無所闕也良耜言報時稯壯者則專主祭社
稷而有**有捋其角**捋音求○大東傳曰捋長貌○傳曰社稷之牛角尺**以似以續**蘇氏
曰興來歲**續古之人**曹氏曰續古之人則先農
繼往歲也

此詩為報社稷必陳農功之本末故當秋時而追述
春耕預言冬穫也言農人以畟畟然刃利之善耜始
有事於南畝而耕之以播種其百穀其種子曰實皆

函生氣而生農人在南畝之時有來省視汝者乃其
婦也載其方箱及其圓筥所盛之饌維是黍也黍貴
者之食農人食黍見豐年也饌者見農夫所載之筥
糾結其緣以縛鋤之器趙刺其地薈去陸草之茶水
草之蓼荼蓼皆穢草既朽敗矣黍稷乃茂盛矣及其
成熟乃穫刈之其穫聲恁恁然及積聚之粟粟然堅
實所積聚者其崇高如城雉其比迫如櫛齒於是開
一族之百室一時而納之百室既盈矣婦與子則安

寧矣年熟民安乃殺是黃牛黑唇之犍牡其角抹然而長用之以報祭社稷求嗣歲之豐續古人先農先嗇之功也

良耜一章二十三句

絲衣繹賓尸也

箋曰繹又祭也天子諸侯曰繹以祭之明日卿大夫曰賓尸與祭同日周繹商

謂之彤○疏曰祭宗廟之明日又設祭祀以尋繹昨日之祭謂之為繹以賓事所祭之尸經之所陳皆繹祭始

末之事也高子曰靈星之尸也

疏曰子夏作序唯一句而已後世有高子者別論他事云

靈星之尸言祭靈星之時以人為尸後人以高子言靈星尚有尸宗廟之祭有尸必矣故引高子之言以證賓

尸之事必是子夏之後毛公之前有人著之高子者不知何人孟軻弟子有公孫丑者稱高子之言以問孟子則高與孟子同時趙岐以為齊人言高子蓋彼是也靈星者不知何星漢書郊祀志云高祖詔御史其令天下立靈星祠張晏云龍星左角曰天田則農祥也晨見而祭之史傳之說靈星惟有此耳未知高子所言是否

絲衣其紃

孚浮反。傳曰：絲衣祭服也。紃，絮鮮貌。○疏曰：爵弁之服，玄衣纁裳，皆以絲為之，故云絲。

衣也。○曹氏曰：餘衣皆用布，惟冕與爵弁服用絲。大夫以上祭服謂之冕，士祭服謂之弁。其首服弁則其衣用絲，故知絲衣為載弁侑侑。載如字，又音戴。弁音卞。侑音士助。祭之服也。

載弁侑侑

求○箋曰：載猶戴也。弁，爵弁。

也。爵弁而祭於王，士服也。緹，禮輕使士。○疏曰：若正祭則小宗伯省牲，祗滌濯逆盥，省鑊告時于王，告備于王。彼正祭禮重，使小宗伯此緹祭輕，故使士蓋亦宗伯之屬。載弁者，侑侑則侑侑人貌，故為恭順言卑者恭順則

俎基

尊者可知。盥音咨。○曹氏曰：雖記云大夫冕而祭於公，弁而祭於己，士弁而祭於公，冠而祭於己。注云：弁，爵弁也。冠，玄冠也。爵弁，冕之次，其色亦而微黑，如爵頭。然其制與冕同，而其前不俛。○傳曰：保球恭順貌。自堂

自堂

基。箋曰：使士升門堂視壺濯及蓬豆之屬，降往於基。告濯具。○傳曰：基，門塾之基。塾音孰。○疏曰：釋宮云：門側之堂謂之塾。孫炎云：夾門堂也。直言自堂，俎基何知非廟堂之基者？以釋禮在門不在廟，故知非廟堂也。郊特牲云：繹之於庫門，內祊之於東方，失之矣。繹於門內為失明，其當在門外祊，以東方為失明，其當在西方，是祊之與繹一時之事。禮器云：為祊乎外。注云：祊，祭明日之繹祭也。謂之祊者，於廟門外之傍，因名焉。基是門塾之基，謂廟門西。自羊俎牛。傳曰：自羊俎牛，言先小夾之堂基也。祊音餅。自羊俎牛。後大也。○箋曰：又視牲從羊之牛反告充。○疏曰：自堂俎基，但言所往之處，不言所為之事。牛羊但言所視之物，不言所往之處，互相

足鼎鼎及鼎鼎音耐鼎音茲。傳曰大鼎謂之鼎小鼎謂之鼎。箋曰已乃舉鼎審告衆禮之次。

也鼎國奔上謂之鼎鼎音耐鼎音茲。傳曰大鼎謂之鼎小鼎謂之鼎。箋曰已乃舉鼎審告衆禮之次。

冢亡歷反奔古掩字冢亡歷反奔古掩字。傳曰大鼎謂之鼎小鼎謂之鼎。箋曰已乃舉鼎審告衆禮之次。

之。觥變於祭也。○曹氏曰旅酬之後恐有失禮者以此罰之。○觥解見柔扈。○疏曰兕觥爵祿然徒設無所用之。○觥解見柔扈。○疏曰兕觥爵祿然徒設無所用之。

之。旨酒思柔朱氏曰思語辭也柔和也。傳曰吳不教去聲。傳曰吳諱教也。李氏曰大聲也。曹氏曰言語則謹默而不詳威儀則恭敬而無敖。○疏祭未舉其不慢則當祭敬明矣。

胡考之休胡考解見載芟

此述繹祭之事上五句言祭之初下四句言禮之末

方繹祭之初使士行禮在身之服以絲為衣其衣紵

然而鮮絜在首戴爵升其人俵俵然恭順此士從門
堂之上既視壺濯及籩豆又降往於門塾之基告君
以濯具也又更視三牲從羊而往牛所以告充也

肥充

也有大鼎曰鼐小鼎曰鼯又發舉其冪所以告絜也

反覆展視所以致勤敬也祭初卑者恭順則尊者可
知矣至於祭末旅酬之節兕觥罰爵觶然上曲徒設
而不用由此助祭飲美酒者皆柔和不異而謹譁不
教而倨慢故事如禮無所用罰祭末不慢則當祭敬

明矣恭敬獲福宜其得壽考之休也

絲衣一章九句

酌告成大武也言能酌先祖之道以養天下也

說者多以酌即是勺然勺是成王之樂而此詩言告成大武其說難通今考象者文王之舞也故維清象舞之樂章其詩言文王之典武者武王之舞也故武頌武舞之樂章其詩言武王之烈勺是成王之舞樂莫盛於韶勺者謂皆繼治世之事故為樂之盛也若酌頌果

為勺舞之樂章必當述成王繼承之事今其詩止述
武王用兵創業首序又云告成大武則此酌亦是武
舞之樂章非勺舞之樂章矣禮記言十三學舞勺漢
禮樂志言周公作勺其字皆單作勺此酌其字從酉
傍雖皆為斟酌之義然所斟酌之事則不同勺舞言
成王能酌文武之道以保太平之治也此酌頌言武
王初則遵養繼則躋躋酌其時措之宜也左氏傳以
武頌為武之卒章以賚為武之三以桓為武之六朱

氏謂桓賚二篇皆大武篇中之一章其言信而有證
朱氏又以酌及賚般皆不用詩中字名篇疑取樂節
之名如曰武宿夜云耳然則酌與賚般一體亦大武
篇中之一章明矣但古人制樂皆沿襲前王之樂而
為之張子謂勺是周公制禮樂時於大武有所增添
其說是也如漢武德舞高祖所作象其除亂蓋武舞
也其後孝景采武德舞為昭德舞以尊太宗孝文之
廟則為文舞矣周公增損大武以為勺亦猶是也勺

舞必自有樂章今不得而考耳講師見此頌名酌遂以酌祖道養天下之說攬入之此正說成王之勺非武王之酌也兼此詩所言遵養亦非謂養天下也

於鑠王師

於音烏鑠舒灼反。朱氏曰鑠盛也。疏曰毛以為武王鄭以為文王。今曰王師王之

造皆武王也

遵養時晦

傳曰遵率也。朱氏曰言武王之初有於鑠之師而不用。蘇氏曰退自

循養與時皆晦

時純熙矣

箋曰純大也。是用大介。箋曰介助蘇氏曰熙光也。蘇氏

曰天下無不助之

我龍受之

箋曰龍寵也。李氏曰武王寵而受之

躋躋王之造

躋音矯造毛音早鄭音慥。傳曰躋躋武貌造為也

載用有嗣

李氏曰是用後世嗣續而不絕實

維爾公

句

允師

李氏曰其所以傳嗣而不絕者
蓋能合天下之公而信於衆也

於乎盛哉武王之師也其初有衆而不用退自循養
與時偕晦非有心於得天下也既而時大熙明天下
之人無不助之武王乃不得已而寵受之於是蹻蹻
然威武以興事造業是用嗣續以傳之後世實由爾
武王之至公足以信於衆也順天人之心者公也信
者公之洽允者信之固也

酌一章九句

桓講武類禡也

禡音罵。箋曰：類也。禡也。皆師祭也。○疏曰：武王將欲伐殷，講習武事，又為類。

祭於上帝為禡。祭於所征之地，治兵祭神，然後克紂。至周公成王太平之時，詩人追述其事而為此歌焉。王制云：天子將出征，類乎上帝，禡於所征之地。春官肆師云：類造上帝，類禮侏郊祀而為之者，春官肆師云：凡四時之大甸獵，祭表貉，則為位。注云：貉，師祭也。於立表處為師祭。祭造軍法者，禱氣勢之增倍也。其神蓋蚩尤或曰：黃帝禡周禮作貉，又或為貉，字古今之異也。甸音田，貉莫駕反，鄭音陌。桓武志也。王氏曰：也而曰綏，萬邦婁豐年，則其為武志也異乎人之武志矣。○解頤新語曰：講武而類于上帝，禡於所征之地，皆師祭也。此為武王伐商之事，明矣。然是時有其事而無其詩，以頌聲未作故也。至成王制禮作樂，於是作此頌以歌其事，以告於武王。序詩者謂之武志，蓋發明武王將出征而講武焉，其志已欲保厥士而用四方定厥家。

而昭于天後果能如其志可謂善得詩人之旨也。朱氏曰左傳以此為大武之六章

綏萬邦

箋曰綏安也

婁豐年

婁音屢。箋曰婁也。誅無道安天下則必有豐熟之年陰陽

和也。屯音棄。李氏曰綏萬邦言武王之用兵所以安萬邦故能享豐年之報。老子云大兵之後殺戮為多傷天地之旅所起荆棘生焉蓋以大兵之後殺戮為多傷天地之和氣此所以凶年也。武王之用兵志在於容民畜衆非快一己之私欲蓋為天下除害故能召天地至和之氣所以獲豐年之報也。孔氏舉唐十九年左傳云昔周饑克殷而年豐是伐紂之後即有豐年也。孔氏徒見左氏之言與詩合然不知周豈有饑哉如其有饑則不足為婁豐年矣。天命匪解音懈。蘇氏曰天命桓桓武王錢氏曰桓桓威

武保有厥士

李氏曰士與熊羆之士虎賁之士同

于以四方克定厥家於

昭于天

於音鳥

皇以間之

間去聲。箋曰：皇，君也。傳曰：間，代也。○今曰：多方云有邦間。

之

武王克商以安天下數有豐年是天命之於周久而
不倦也天命所以不倦者由桓桓然有威武之武王
能保有其衆以用之於四方而安定其國家故歎美
其德昭明于天遂君天下而代商也

桓一章九句

賚

音賴

大封於廟也

箋曰：武王伐紂時封諸臣有功者。○疏曰：大封則所封者廣宣十二年左

傳云昔武王克商而作頌其三曰敷時繹思我祖維求
定昭二十八年左傳云昔武王克商光有天下其兄弟
之國者十有五人姬姓之國者四十人皆舉親也廟謂
文王廟也祭統云古者明君必賜爵祿於大廟示不敢
專也○李氏曰宣王之時命孝公為侯伯命之於夷宮
亦是不敢自專也為天子者封功臣必告於廟為諸侯
者班爵祿亦在於廟衛之周治既服將命
則知亦在於廟然不知所任者非人也
賚予也
予上聲

言所以錫予善人也

疏曰武王大封功臣以為諸侯周
公成王太平之時詩人追述其事

而為此歌焉○李氏曰語云周有大賚善人
是富○朱氏曰左傳以此為大武之三章

文王既勤止

錢氏曰止語辭

我應受之

傳曰應當也

敷時繹思

朱氏曰敷

布繹習也○錢氏曰繹紬也

我祖維求定時周之命

箋曰是周之所
以受天命而王

之所
由也

於繹思

於音
烏

武王既封諸臣於廟因戒勅之言文王勤勞天下至
矣我當而受之敷布其事而紬繹思念之不敢忘也
敷言所思之廣也我自今以往維求天下之安定而
已此周之受天命也又歎使諸臣受封賞者繹思之
亦不可忘也念文王創業之難及念上天安民之意
則所用皆善人可知矣

齊一章六句

般音巡守而祀四嶽河海也

巡守音旬狩。蘇氏曰：遊般也。疏曰：武王既定天

下巡行諸侯所守之土，祭祀四嶽河海之神，神皆饗其祭祀，降之福祚。至周公成王太平之時，詩人述其事而作此歌焉。中嶽無事故，序不言。漢書溝洫志云：四瀆河為宗，然則河為四瀆之長。言河可以衆之，經無海而序言海者，海是衆川所為，歸經雖不說，祭之可知。曹氏曰：時邁為武王巡守之頌，則般頌成王矣。

於皇時周

於音烏。箋曰：皇，君也。

陟其高山

箋曰：陟，登也。

墮山喬嶽

墮，隨

之上。釋文曰：墮，山形狹長也。傳

允猶翕河

箋曰：允，信也。

曰山之墮小者也。箋曰：喬，高也。

李氏曰：猶，謀也。傳曰：翕，合也。蘇氏曰：翕，河大河受衆水者也。今日禹貢河自大陸北播為九河，同為逆

河注云：同合為一大河名。

敷天之下

箋曰：敷，徧也。

裒時之對

逆河，然則翕河即逆河也。

裒音摺。傳曰裒聚也。○箋

時周之命

箋曰遍天之下衆山川之神皆

曰對配也。○疏曰配祭之

如是配而祭之是周之所以受天命而王也。○錢氏曰周之所以為百神主也

於乎君哉是周家也其巡守所至則登其高山又及
墮然狹長之小山與喬高之四嶽皆徧祭之高山墮
山則祭法所謂山林丘陵能出雲為風雨皆曰神者
也喬嶽則四嶽也又以誠信謀猶大河而祭之謀如
載謀載惟謂討論其禮也徧天之下凡山川之神皆
裒聚而昭對以祀之此周之所以受天命而為神主

也對者有對越無愧之意以天命在焉故也

般一章七句

詩緝卷三十四

欽定四庫全書薈要卷一千三十五

經部

詩緝卷三十五

宋 嚴 粲 撰

魯頌

譜曰魯者少昊摯之墟也周公歸政成王封其元子伯禽於魯其封域在禹貢徐州大野蒙羽之野自後政衰國事多廢十九世至僖公當周惠王襄王時而遵伯禽之法養四種之馬牧於坰野尊賢祿士脩泮宮守禮教僖十六年冬會諸侯于淮上謀東畧公遂伐淮夷僖二十年新作南門又脩姜嫄之廟至於復魯舊制未徧而薨國人美其功季孫行父請命於周而作是頌○疏曰脩泮宮春秋不書者脩謂舊有其官脩行其教學之法功費微小非城郭都邑例所不書也春秋經傳僖公無伐淮夷之事案左傳僖十六年冬公會諸侯于淮未歸

而使師取項公為齊所止十七年方始得還傳云書曰
公至自會猶有諸侯之事焉且諱之也經傳無伐淮夷
文者當是史脫漏脩姜嫄之廟春秋不書者魯國舊有
此廟更脩理之用功少例所不書也○朱氏曰魯今襲
慶東平府沂密海等州即其地也夫子云魯之郊祀非
禮也周公其衰矣而程子亦云成王之賜伯禽之受皆
非也蓋不與其僭也然則刪詩之際何取乎此而著于
篇乎曰著之所以見其僭也春秋書郊禘大雩雉門兩
觀猶是意也削之則沒其實矣抑魯於天子禮樂有得
用之文而是頌之作又嘗請命于天子而為之其辭特
以贊美當時之事其體猶列國之風非若商周天子之
頌用於祭祀以詠歌先祖之功烈也聖人於此以為其
文若可以無嫌者故其文予之而實則不予也况夫子
魯人亦安得而削之哉或曰魯之無風何也先儒以為
時王褒周公之後比於先代故巡守不陳其詩而其篇
第不列於大師之職是以宋魯無風其或然歟或謂夫

子有所諱而削之則當時列國大夫賦詩相屬及吳季
子觀周樂於魯皆無曰魯風者其說不通矣○曹氏曰
明堂位云成王命魯公世世祀周公以天子之禮樂祀
帝于郊配以后稷天子之禮也若魯公果受成王之命
則當自伯禽以後踵而行之矣由伯禽至僖公凡十有
八世考諸春秋史記皆未嘗行郊禮而惟僖公行之豈
成王之命獨豫加於僖公歟故知其僭自僖公始也夫
以諸侯而僭天子之禮天子雖不能討而天亦吐之是
以僖三十一年夏四卜郊不從乃免牲宣三年春郊牛
之口傷改卜牛牛死乃不郊成七年春鼯鼠食郊牛角
乃不郊襄元年春鼯鼠食郊牛角定十五年鼯鼠食郊
牛角牛死皆改卜牛然則天之不歆其祀亦可見矣夫
祭天天子之大禮也而猶敢僭
焉則其僭而作頌抑其次也

魯頌頌之變也周之王也積累深久由風而雅雅而

頌及其哀也至懿風始變至厲雅始變至平雅遂亡
頌聲之息前乎風雅之變矣越桓莊僖惠至襄而魯
乃有頌雅頌天子之詩也頌非所施於魯况頌其郊
乎考其時則非揆其禮則殊汰哉克也不如林放矣
聖筆不刪其以著魯之僭而傷周之哀歟是故雅變
而亡頌亡而變雅之亡甚於變頌之變甚於亡也駟
寶風耳存其頌名而謂之變頌可也

駟

古煢反

頌僖公也

疏曰舒瑗云魯不合作頌故每篇言頌明生於不足也僖公名申莊公子

閔公卒季友立之
當惠王襄王時
僖公能遵伯禽之法儉以足用寬以

愛民

疏曰儉以足用寬以愛民說僖公之德與務農重穀為首引於經無所當也

務農重穀

牧于坰野

同音

魯人尊之於是季孫行父請命于周

音父

甫○箋曰季孫行父季文子也○朱氏曰請命之事不見於春秋豈行父使人請之歟

而史克作

是頌

箋曰史克魯史也○疏曰此頌之作在僖公薨後知者以大夫無故不得出境上請天子追頌君德

雖則羣臣發意其行當請於君若在僖公之時不應聽臣請王自頌已德明是僖公薨後也文六年行父始見於經十八年史克名見於傳則克於文公之時為史官矣然則此詩之作當在文公之世其年月不可得而知也
駟頌序云史克作是頌廣言作頌不指駟篇則四篇皆史克作閔官云新廟奕奕奚斯所作自言奚斯作新

廟耳而漢世文人班固王延壽之等謂魯頌是奚斯作之謬矣文十八年左傳稱季文子使太史克對宣公知史克魯史也此雖昔名為頌而體實國風非告神之歌故有章句也

孔氏考魯頌作於僖公身後非也今觀閟宮等篇多未有所事實而願其如此如曰俾爾耆艾黃髮兒齒晬然為生前祝頌之辭蓋生前作之後乃聞之天子以文過耳未必得請而後作也牧馬一事耳頌於何有

駟駟牡馬

傳曰駟駟良馬腹幹肥張也

在坰之野

傳曰坰遠野也邑外曰郊郊外曰野

野外曰林林外曰坰○箋曰必牧於坰野者避民居與良田也周禮云以官田牛田賞田牧田任遠郊之地○

李氏曰垌之野其水草甚美既不害於農又使馬得其
所養詩言務農重穀但觀牧馬於遠方之地則可見矣

薄言駟者

程子曰薄言發語辭○劉氏曰薄言者聊言之而已

有驕有皇

驕音聿○釋畜

曰驪馬白跨驕黃白皇跨若化反○疏曰孫炎云驪黑色郭璞云跨髀間所跨據之處○皇解見東山髀比陞

二有驪有黃

傳曰純黑曰驪黃驂曰黃○疏曰其驪與黃爾雅無文月令孟冬駕鐵驪象時之色

檀弓云夏后氏尚黑戎事乘驪驂赤色也黃驂謂黃而雜赤色者

以車彭彭

如字音棚考見出車

○蘇氏出車解曰彭彭壯盛也

思無疆

曹氏曰思無疆言其思之廣也

思馬斯臧

箋曰臧善

有駟駟然腹幹肥張之牡馬其牧養之乃在遠野之

垌不以妨農也略言其駟駟者是何馬乎乃有驕皇
驪黃之四色用之以駕車則彭彭然壯盛此由僖公
思慮廣大無疆所思乃至於馬牧之得所而馬思善
然僖公未能思無疆也

駟駟牡馬在垌之野薄言駟者有騅

騅音追騅音丕○釋畜曰

蒼白雜毛騅黃白雜毛騅○郭璞曰騅即今騅馬也騅
今之桃華馬也○疏曰二者皆云雜毛是體有二色之
毛相間雜上云黃白曰皇黃騅曰黃止
有騅有騏音其
一毛色之中自有淺深與此二色者異○傳

曰赤黃曰騅蒼祺曰騏○疏曰騅騏爾雅無文騅為純
赤色上云黃騅曰黃謂黃而微赤此云赤黃曰騅謂赤

而微黃騏者黑色之名蒼祺曰以車伾伾音丕○傳曰

騏謂青而微黑今之驄馬也

思無期曹氏曰思無期言其思之久也

思馬斯才

傳曰多材也○朱氏曰材力也

駟駟壯馬在垆之野薄言駟者有驛有駱

駟音駝駱音洛○釋畜曰

青驪驂驛白馬黑鬣駱驂音鄰郭良忍反○疏曰孫炎云色有淺深似魚鱗也郭璞云色有淺深斑駁隱鄰今

之連錢驄也鬣謂馬之駿也

有駟有雒

駟音留亦作駟雒音洛○傳曰赤身黑鬣曰駟黑身白鬣

曰雒○疏曰駟雒爾雅無文駟為赤色若身鬣俱赤則駟馬故赤身黑鬣曰駟即今之駟馬也

以車繹

繹

音亦○傳曰繹繹善走也

思無斁

音亦○箋曰斁厭也無厭倦也

思馬斯作

蘇氏曰作

也奮起

駟駟壯馬在坳之野薄言駟者有駟有駟

駟音因駟音遐○釋畜曰

陰白雜毛駟形白雜毛駟○孫炎曰陰淺黑也○郭璞曰駟今之泥驄也形赤也

有驥有魚

驥音

輦○傳曰豪駟曰驥駟開之去音覓○疏曰驥爾雅無文駟者膝下之名謂毫毛在駟而白長○釋畜曰一目

白○郭璞曰似魚目以車祛祛起居反○傳曰思無邪

朱氏曰詩三百一言以蔽之曰思無邪蓋取諸此○蘇氏曰昔之為此詩者則未必知此也孔子讀詩至此而有會於其心是以思馬斯徂箋曰徂猶行也

取之蓋斷章云爾

駟四章章八句

有駟音弼頌僖公君臣之有道也

箋曰有道者以禮義相與之謂也

有駮止述燕飲序辭衍矣

有駮有駮

傳曰駮馬肥彊貌。詩記曰興僖公有臣之壯盛也。

駮彼乘黃

乘去聲。○疏曰

四馬曰乘黃黃馬也。

夙夜在公

箋曰早起夜寐在於公之所。○錢氏曰在公家也。

在公明

明

李氏曰職事皆脩明。

振振鷺

振振解見周頌振鷺。

鷺于下

歐陽氏曰振鷺取其能自脩潔。

翔集有威儀也。○曹氏曰于下其初翔而集也。

鼓咽咽

音淵。○傳曰咽咽鼓節也。○朱氏曰鼓聲之深。

長醉言舞

錢氏曰言語助。○蘇氏曰僖公於是燕之以禮樂士之來者如鷺之集其醉者或起舞以

相樂和

于胥樂兮

樂音洛。○箋曰于於也胥皆也。

有駮然而肥强者維何乎其駮然肥强者是彼一乘

之黃馬也連言有馭非一馬也馬肥強則致遠喻臣
壯盛則勝任也其臣自早逮夜在於公家其在公家
相與脩明其職言忠勤也僖公於是燕之以禮樂羣
臣之來燕者皆脩潔而有威儀如振振然羣飛之白
鷺翔集而來下也燕樂之時鼓聲咽咽然深長其醉
者或起舞以盡其歡於是君臣之間皆喜樂也

有馭有馭彼乘牡

王氏曰牡剛強之材也

夙夜在公在公飲酒

箋曰言臣有餘敬君有餘惠

振振鷺鷺于飛

箋曰飛喻羣臣醉欲退也

鼓咽咽醉

言歸于胥樂兮

有駟有駟彼乘駒

音綯○釋畜曰青驪駒○孫炎曰色青黑之間○郭璞曰駒今之鐵

也驄夙夜在公在公載燕

箋曰載之言則也

自今以始

句

歲其有

君子有穀

句○箋曰穀善也

詒孫子于胥樂兮

羣臣既燕而祝頌其君以為自今以始歲事其當豐

稔君子僖公有善道可以遺孫子於是君臣皆喜樂

也

有駟三章章九句

泮水

泮音判

頌僖公能脩泮宮也

曹氏曰泮宮閼宮皆魯所舊有僖公因而脩之

非大功業故春秋不書

思樂泮水

樂音洛○王氏曰思語辭也○傳曰泮水泮宮之水也天子辟廡諸侯泮宮○箋曰辟廡

者築土壅水之外圓如壁四方來觀者均也泮之言半也半水者蓋東西門以南通水北無也○疏曰辟廡者築土為堤以壅水之外使圓如壁釋器云肉倍好謂之壁孫炎云肉身也好孔也身大而孔小然則壁體圓而內有孔此水亦圓而內有地是其形如壁也言四方來觀者均則辟廡之宮內有館舍外無牆院也泮宮必疑南有水者以行禮當南面而觀者宜北面蓄水本以節觀者宜其先節南方故知南有水而北無也好去上二聲冬官玉人薄采其芹音勤○箋曰芹水菜也○解見采菽魯侯戾止臣注云壁孔也

傳曰戾至也

言觀其旂其旂葳葳

音旆。李氏曰葳葳飛揚也。○錢氏曰葳葳草葉多

貌旂下垂如葉之多也

驚聲噦噦

音誨呼會反。○王氏曰噦噦有節也。○朱氏曰和也。

無小

無大從公于邁

箋曰于往也邁行也。○李氏曰漢明帝開辟雍冠帶搢紳之人圜橋門而觀聽

者蓋億萬計

魯人以僖公能脩泮宮而喜之言樂哉此泮水我往

觀之而采其水中之芹也非以采芹為樂樂其脩泮

宮而託采芹以言之也僖公來至此泮宮我則觀其

所建之旂其旂葳葳然飛揚其鸞鈴之聲噦噦然有

節稱其儀物之美者喜其來至之辭如所謂聞車馬之音見羽旄之美舉欣欣然有喜色也國人無幼無長皆從公往行而至泮宮以觀行禮言人心翕然樂從之也

思樂泮水薄采其藻

音早○藻解見召南采蘋

魯侯戾止其馬蹻蹻

音矯○傳曰蹻蹻言強盛也

其馬蹻蹻其音昭昭

音治○李氏曰見其聲音之好音者

聲也○今日孟子云何其聲之似我君也

載色載笑

傳曰色溫潤也○王氏曰載色載笑洪範所謂

而康而色也○黃氏曰即之也溫

匪怒伊教

曹氏曰猶夫子循循然善誘人也

僖公在泮宮笑語其聲音昭昭然明亮載色而和載笑而樂未嘗有怒唯教之而已

思樂泮水薄采其茆

音卯○曰茆萑也○傳曰鳧葵也鳧音符○疏曰陸璣疏云茆與荇

菜相似葉大如手赤圓有肥者著手中滑不得停莖大如七柄葉可以生食又可羹滑美江南人謂之萑菜或謂之水葵諸陂澤水中皆有○曹氏曰醢人有茆菹麋鷄以為朝事之豆魯侯戾止在泮飲酒既飲旨酒永錫難老

疏曰天長與之以難老之福

順彼長道屈此

羣醜

王氏曰屈服也醜衆也

僖公既來至泮宮則與羣臣飲酒既飲美酒皆祝頌

僖公願天長錫之以難老之福順從長遠之道以屈服此魯國之羣衆也

穆穆魯侯

疏曰穆穆美也

敬明其德敬慎威儀維民之則

箋曰則法

也允文允武昭假烈祖

假音格○朱氏曰假感格也烈祖周公魯公也

靡有不

孝自求伊祐

音戶

穆穆然美者僖公也能敬明其德又敬謹其威儀內外皆善為下民之所法則也信有文矣信有武矣昭格於功烈之祖周公伯禽也僖公所行無不盡其孝

道以此得福乃自求之也

明明魯侯克明其德既作泮宮淮夷攸服矯矯虎臣

居矯

表反○箋曰矯矯武貌○今曰矯矯王之造字異音義同

在泮獻馘

音國○解

淑問

如臯陶

音遙○箋曰淑善也○疏曰善問獄者

在泮獻囚

傳曰囚拘也○疏曰所馘者是

不服之人須武臣之力殺其人而取其耳故使武臣如虎者獻之所囚者服罪之人察獄之吏當受其辭而斷其罪故使善聽如臯陶者獻之

有明明之德者僖公也能益明其德既作泮宮之後
將伐淮夷而服之有矯矯然威武如虎之臣於此泮

宮獻其所已殺而截其左耳以為馘者又有善問獄之臣如臯陶者於此泮宮獻其所生執而囚之者古者受成于學故出征執有罪反釋奠于學以訊馘告詩人因其脩泮宮可以為獻功之地而頌禱之耳自此以下皆然非有實事也

濟濟多士克廣德心

李氏曰夫人心可謂廣矣以其無所不至無所不有也惟其為血氣

所使一有毫釐之利則忿而爭其心於是乎隘惟其寬厚未嘗褊躁此其心所以廣也

桓桓于征

傳曰桓桓武貌狄彼東南

狄音剔○釋文曰狄遠也○王氏曰攘而逃之○蘇氏曰古狄逃通○曹

氏曰敵人畏而遠之
烝烝皇皇
箋曰烝烝猶進進也○李氏曰皇皇大也○曹

氏曰其並進而嚮敵也烝烝
不吳不揚
吳如字又音話○吳解見絲衣

然其合衆而為大也皇皇然
不告于訕
音凶○箋曰訕訟也○李氏曰左

揚輕揚也
不告于訕
傳襄公二十六年楚子侵鄭鄭皇

頡戕之出與楚師戰敗穿封戌囚皇頡公子圍與之爭
之正於伯州犁伯州犁曰請問於囚乃立囚伯州犁曰

所爭君子也其何不知上其手曰夫子為王子圍寡君
之貴介弟也下其手曰此子為穿封戌方城外之縣尹

也誰獲子囚曰頡遇王子弱焉蓋爭其功者戰士之常
也僥倖一勝萬死一生之間惟圖厚賞而已則其爭功

無所
在泮獻功

濟濟然衆盛之多士能廣大其德心並無褊躁忿爭

之失桓桓然有威武之容而往行征伐攘遠彼東南
之淮夷使之不得侵近邊境此多士勇於嚮敵烝烝
然而進其勢之合皇皇然而大不吳而諠譁不揚而
輕浮無有告於治訟之官者無爭訟也唯在泮宮之
內獻其戰功而已

角弓其觶

音求○箋曰觶然言持弦急也○蘇氏曰弓健貌

束矢其搜

音蒐○傳曰五

十矢為束○疏曰孫卿論兵云魏氏武卒衣三屬之甲
操十二石之弩負矢五十箇是一弩用五十矢矣孫則
毛氏之師故從其言以五十矢為束也大司寇云入束
矢於朝注云古者一弓百矢其百箇與則鄭意以百矢

為東尚書及左傳所言賜諸侯以弓矢者皆云彤弓一
彤矢百以一弓百矢故謂東矢當百箇而在軍之禮重
弓以備折壞或亦分百矢以為兩束故不易傳也其發
則搜然而勁○箋曰搜然言勁疾也○蘇氏曰矢疾聲
戎車孔博朱氏曰博廣大也徒御無斃箋曰無厭倦也既克淮夷孔淑

不逆

箋曰淑善也

式固爾猶

箋曰猶謀也

淮夷卒獲

言角弓觭然而健一束五十之矢皆發之其聲搜然

言勁疾也其戎車甚博大徒行者御車者皆競勸而

無厭倦故能克勝淮夷甚善而不逆者兵凶戰危疑

於逆而不善今僖公伐所當伐以順而動也自今益

審固其謀猶則淮夷可以盡獲也皆頌禱之辭

翩彼飛鶚

翩音篇鶚音遙○傳曰翩飛鶚也○曰鶚怪鵠也解見陳墓門

集于泮林

疏曰

泮林泮水之林

食我桑黹

音甚字亦作萁○傳曰黹桑實也

懷我好音

箋曰懷歸也

憬彼淮夷

憬垌之上○李氏曰說文云憬覺悟也

來獻其琛

勅金反○傳曰琛寶也

元龜象齒

傳曰元龜尺二寸○疏曰漢食貨志云龜不盈尺不為寶

大賂南金

賂音路○

傳曰賂遺也南謂荆揚也遺音位○箋曰大猶廣也賂者賂君及卿大夫也荆揚貢金三品○疏曰左傳襄二十五年晉帥諸侯伐齊齊人賂晉侯自六正五吏三十帥三軍之大夫百官之正長師旅及處守者皆有賂金三品彼注云銅三色王肅以為金銀銅

有翩然而飛者惡聲之鴉鳥今來集止於泮水之林
食其桑實乃改其鳴歸就我以善音喻淮夷慕泮宮
之化改惡從善也淮夷世為魯患未必慕泮宮之化
詩人張言泮宮之美以為淮夷亦將來慕也能悟覺
而從化者彼淮夷也今就魯國獻其琛寶有尺二寸
之大龜有象齒又大遺以南方之金亦頌禱之辭

泮水八章章八句

閼宮

閼音秘

頌僖公能復周公之宇也

箋曰宇居也○疏曰謂土地居處也

○蘇氏曰所謂居常與許復周公之宇者人之所以願之而其實則未能也○李氏曰魯以諸侯之國而祀姜嫄后稷周之先王不可也郊天之祭亦不可也此詩示誇耀不亦過乎○黃氏曰僖公在位三十三年伐邾者四敗莒滅項者一此魯之自用兵也其四年伐楚侵陳六年伐鄭是時齊威公方稱伯主兵率諸侯之師而魯亦與焉爾二十八年圍許是時晉文公方稱伯主兵率諸侯之師而魯亦與焉爾春秋所記凡魯之自主兵者皆邾莒項之小國至於所伐大國皆齊晉主兵則膺戎狄懲荆舒奄龜蒙荒大東荒徐宅至于海邾淮夷蠻貊及彼南夷莫不率從在僖公果有是乎

閔宮止為僖公能脩寢廟張大其事而為頌禱之辭猶斯干之意耳序摘詩中復周公之宇一語以題之

非事實也

閔宮有恤

音恤○傳曰閔閉也恤清靜也○朱氏曰閔深閉也○呂氏曰閔宮魯廟非姜嫄廟也

實實枚枚

蘇氏曰實實鞏固也○傳曰枚枚磐密也磐音聲

赫赫姜嫄

音元○箋曰赫

赫顯著也

其德不回上帝是依無災無害彌月不遲

箋曰彌終也終

十月而生子不遲晚

是生后稷降之百福

曹氏曰后稷以此開國以至子孫為帝王所謂

百福也

黍稷重穋

重平聲穋音六○今考重字亦作種穆字亦作稊

植穠菽麥

音植

植穠音雉○傳曰先種曰植後種曰穠○疏曰重穋植穠生熟早晚之異稱耳非穀名先種曰植後種曰穠當

謂先種先熟後種後熟但傳畧而不言其熟耳七月傳曰後熟曰重先熟曰穆天官內宰鄭司農注云先種後

熟謂之種後種先熟謂之稂是傳朱氏曰堯亦畧而不言其傳與此互相明也 奄有下國封之郅也

俾民稼穡有稷有黍有稻有秬音巨○箋曰秬黑黍也 奄有下土

劉氏曰奄有下國書言后稷建邦啓土是也夫如是則民附之而無此疆爾界矣故能奄有下土也語言稷躬稼而有天下是也奄有下國所以 續禹之緒傳曰緒業原其始奄有下土所以要其終也○錢氏

曰至武王遂能奄有天下繼禹之業

作者將美僖公追述遠祖上陳姜嫄后稷至於大王文武爰及成王封建之辭魯公受賜之命言其所以有魯之由也魯之羣廟其宮深閼儼然清靜又實實

然鞏固枚枚然細密既言其廟遂推本周家所由興
言赫赫乎顯著者姜姓之女名嫫也其德不回而有
常天用是憑依其身使之有子無災殃無患害彌終
十月而生子不遲晚其所生者乃是后稷天降與之
以百種之福使之有黍有稷有先種後熟之重後種
先熟之穆先種先熟之植後種後熟之穉又有菽與
與麥以此覆有下國而受封於邠使民知稼穡之道
也復申說其事有稷黍稻秬後世脩后稷之業遂有

天下繼禹之業也

后稷之孫實維大王

太音泰

居岐之陽實始翦商

箋曰翦斷也大

王有王迹故云是始斷商斷音短

至于文武續大王之緒致天之屆

音戒

○王氏曰屆至也○今曰小弁不知所屆

于牧之野無貳無虞

箋曰虞度也

上帝

臨女音汝敦商之旅

敦鄭音堆徐如字

克咸厥功

箋曰敦治也旅衆也咸同也○

今曰敦商謂治而正之言伐商也伐商之衆謂我之士衆旅猶敦琢其旅之旅十亂一心三千同德是也同其功謂共成其功也

后稷之孫實維大王自豳而來居於岐山之南民往

歸之初有王迹實始有斷商之萌兆也至于文王武
王武王纘繼大王之緒業前乎此天雖眷周而大命
未至及牧野之戰天命至矣實文武之德有以致之
故曰致天之届于牧之野也唯天命已至故武王無
有疑貳無有虞度上帝實臨之上順天心也與伐商
之羣衆同其功下順人心也豈武王之私欲哉

王曰叔父

傳曰王成王也○
箋曰叔父周公也

建爾元子

傳曰元首也○李
氏曰元子封於魯

其餘則凡蔣邢茅
昨祭焉祭音再

俾侯于魯大啓爾宇

傳曰宇居也○今
曰箋謂封以七百

里今不從○王氏曰孟子云周公之封於魯為方百里也地非不足也而儉於百里○李氏曰詩人言大啟爾宇不過諸公侯為周室輔乃命魯公箋曰魯公伯禽也俾侯于東東東

藩魯錫之山川導江鮮于氏曰山川謂境內之山川也土田附庸導江鮮于氏曰孟子云不

能五十里不達於天子附於諸侯曰附庸○疏曰論語云夫顓臾昔者先王以為東蒙主是社稷之臣顓臾魯之附庸謂之社稷之臣者以其附屬於魯亦謂魯之社稷○李氏曰春秋之時有邦國亦魯之附庸也

孫莊公之子傳曰謂僖公也龍旂承祀曹氏曰司常言日月為常王建之交龍為旂諸侯建

之僖公雖僭郊天之禮而猶以龍旂承祀不建太常猶不敢全僭天子禮也而明堂位乃曰日月之章則又過矣

六轡耳耳六轡解見駟鐵○傳曰耳耳至盛也春秋匪解音懈○箋曰春秋猶言四時也○疏曰錯

舉春秋以明冬夏

享祀不忒

箋曰忒變也○李氏曰差忒也

皇皇后帝

李氏曰皇皇大

之至也○箋曰后帝謂天也

皇祖后稷享以騂犧

傳曰騂赤也犧純也○箋曰魯郊祭

天配之以君祖后稷其牲用赤牛純色與天子同也○李氏曰祭統亦云昔者周公旦有勲勞於天下周公既

沒成王康王追念周公之所以勲勞者而欲尊魯故錫以重祭外祭則郊社是也內祭則大嘗禘是也明堂位

祭統皆漢儒所作故其所言皆未可信也禮運又曰魯之郊禘非禮也周公其衰矣禮記之書如禮運以為魯

不當郊禘如明堂祭統以為魯當郊禘其異同如此當從禮運之說伊川嘗謂說者以周公能為人臣所不能

為之功故得用人臣不得用之禮夫人臣豈有不能為之功哉使功業過於周公亦人臣所當為之天下之事

非人臣為之而誰為之以此觀之則知賜魯之禮樂者非成王為之春秋書郊多矣大抵譏其僭春秋以為僭

而詩乃以為美則知所美非美也左氏云皇皇后帝皇祖后稷君子曰禮謂其先帝而後稷也夫先天而後稷固足以為禮然不知諸侯而用郊禘果可以為禮乎僖公三十一年四月四卜郊不從乃免牲夫以四月之時而卜郊足以見非禮也卜至於四尤以見其非禮安在其為春秋匪解也哉安在其為享祀不忒也哉詩人之言大抵失之誇也○詩故曰魯之郊是僖公之僭禮也春秋自隱桓以下不書郊亦不譏其廢禮知魯之郊自僖公以始其得謂成王以錫是饗是宜劉氏曰言其安周公乎公羊云魯郊非禮也而適之也與公尸來燕降福既多周公皇祖箋曰此皇祖來宜同

而載嘗

箋曰載始也○疏曰毛以為則

夏而福衡

福音福○釋文曰福逼也○傳曰福衡設

牛角以福之也福之之福音逼○箋曰秋將嘗祭於夏則養牲福衡其牛角為其觸觝人也秋嘗而言始者秋

物新成尚之也○疏曰地官封人注云福設於角衡設於鼻

白牡騂剛

傳曰白牡周公牲也騂剛

魯公牲也○疏曰文十三年公羊傳云魯祭周公何以為牲周公用白牡魯公用騂剛羣公不毛何休云白牡牡牲也周公死有王禮謙不敢與文武同也魯公諸侯不嫌也故從周制說文云剛特也白牡謂白特騂剛謂赤特

犧尊將將

犧王如字鄭素河反將音鏘○朱氏曰犧尊畫牛於尊腹也或曰尊作牛形鑿

其背以受酒○疏曰將將盛美也

毛魚鼈羹

魚音包鼈音迄羹音庚○傳曰毛魚豚也鼈肉也羹

大羹鉶羹也○疏曰封人祭祀有毛魚之豚注云燼去其毛而魚之也曲禮注云鼈切肉也大羹者煮肉汁不和鉶羹肉味之有菜和者也大羹謂大古之羹鉶羹謂盛之鉶器其大羹則盛之於登燼徐廉反字亦作燼燼燼湯中燼豆大房也○疏曰明堂位云俎有虞氏以梲夏淪肉

后氏以巖殷以棋周以房俎注云椀斷木為四足而已
巖謂中足為橫距之象棋謂曲撓之也房謂足下跗也
上下兩間有似于堂房然是俎稱房也周語云禘郊之
事則有全烝王公立飫則有房烝親戚燕享則有殽烝
如彼文次全烝謂全載牲體殽烝謂體解節析則房烝
是半體可知禘郊乃有全烝宗廟之祭唯房烝耳明堂
位稱祀周公於太廟俎用椀巖此云大房蓋魯公之萬
廟用大房也椀音欵巖音鰕棋音矩撓音擾跗音孚
舞洋洋今曰詩記以萬舞為二舞之總名解見邶簡孝
孫有慶俾爾熾而昌熾音熾尺志反○疏俾爾壽而臧

箋曰臧善也○曹保彼東方箋曰保魯邦是常箋曰常
氏曰壽而好德也

不虧不崩疏曰虧損也崩落也○箋曰虧崩皆謂毀壞
也○曹氏曰不虧則如月之常盈不崩則如

山之常固

不震不騰

傳曰震動也騰乘也○朱氏曰震騰驚動也皆不安之意○曹氏曰不震則如

地之常靜不騰則如水之常平

三壽作朋

箋曰三壽三卿也

如岡如陵

此說封魯之事成王告周公曰叔父我今立汝首子使之為侯於魯國大開女之土宇言封以百里為周家之藩輔也既告周公乃策命魯公伯禽使為侯於東方之魯國賜之以境內之山川又賜之以境內之土田又賜之以小國之附庸使四鄰小國附屬之至於今日周公之孫莊公之子謂僖公也其車建交龍

之旂承奉宗廟祭祀所乘四馬其六轡耳耳然至盛
春秋四時非有解怠獻享祭祀無有差忒皇皇至大
之天帝及君祖后稷獻享以駢赤純色之牲天與后
稷於是歆而饗之安而宜之其降與之以福既甚多
矣非特天與后稷降之多福而周公與君祖伯禽亦
福於女僖公矣復說祭祀得禮之事將於秋而始嘗
祭先於夏而豫養牲其所養之牛設橫木於角以逼
之謂之楅衡令其不得舐觸人也所養者是祭周公

白色之牡牲與魯公赤色之剛特其祭之時有盛酒
之尊其尊腹之上飾畫犧牛將將然而盛美也其饌
則有爛去其毛而魚之之豚又有切肉之胾又有大
羹鉶羹其食器則有籩豆又有載半體之大俎如堂
房然謂之大房鼎俎已陳籩豆已列於是奏樂舞執
干戚而為萬舞者洋洋然衆多由此祭祀得禮故祖
考祐之令孝孫僖公有福慶也使爾熾盛而昌大使
爾壽考而臧善保安彼東方魯國是守不虧損不傾

頽不震動不乘騰國有壽考之三卿與作朋友皆如
岡陵之固祝其君臣同慶也

公車千乘

去聲○傳曰大國之賦千乘○疏曰大國之賦千乘司馬法兵車一乘甲士三人步卒七

十二人計千乘有七萬五千人則是六軍矣與下公徒三萬數不合者二者事不同也禮天子六軍出自六鄉萬二千五百家為鄉萬二千五百人為軍地官小司徒凡起徒役無過家一人是家出一人鄉為一軍此則出車之常也天子六軍既出六鄉則諸侯三軍出自三鄉下云公徒三萬自謂鄉之所出非此千乘之衆也此云公車千乘自謂計地出兵非彼三軍之事也二者不同故數不相合○李氏曰按司馬法六尺為步步百為畝畝百為夫夫三為屋屋三為井井十為通通十為成成出車一乘則千乘其地方二百一十六里有奇若以

孟子所言周公封於魯地方百里則無緣有千乘也若以明堂位所言封周公於曲阜地方七百里則又不啻有千乘司馬法之言既不合於孟子又不合於禮記不足信也○今日魯頌多夸大之辭不必求其數之盡合也

朱英綠滕

音騰

○傳曰朱英矛飾也騰繩也○疏曰

繩小戎竹閉緼滕謂約之以繩非訓滕為繩

二矛重弓

傳曰重弓重於鬯中也○箋曰二矛重弓

備折公徒三萬

箋曰大國三軍合三萬者舉成數也○疏曰今以春秋驗之則僖公無三軍襄

十一年經書作三軍明以前無三軍也昭五年又書作中軍鄭以周公伯禽之世合有三軍僖公能復周公之宇遵伯禽之法故以三軍解之其實於時唯二軍耳○李氏曰天子之國不啻有六軍所用者惟六軍而已大國不啻有三萬公徒所用者惟三萬而已使舉國之人而盡用之則但可以一役苟不幸而敗則安得人人而

復用之哉此天子之國所以止用六軍大國所以止用

三軍也自伯禽以來已有三軍僖公興其國所以有公

徒三萬觀詩曰大啓爾宇既謂之大啓爾宇豈得無三

軍即伯禽以來已有三軍襄公所以作三軍者則以魯

國三鄉專魯國之權分三軍以為己之賦

故作三軍非是自襄公以來方有三軍也

貝胄朱綬

音胄音綬又音侵○傳曰貝胄貝飾也朱綬以朱綬綴

之○疏曰貝者水蟲甲有文章也胄謂兜鍪貝非為胄

之物故知以貝為飾朱綬直謂

赤綫耳謂以朱綫連綴甲也

烝徒增增

傳曰增增衆也

戎狄

是膺

傳曰膺當也

荆舒是懲

疏曰楚一名荆羣舒楚之與則

莫我敢承

傳曰承止也○李氏曰泮水之詩美僖公能

舒未必不如其服淮夷也辭如是之

俾爾昌而熾俾爾

重復者益祝頌之辭其例如此也

壽而富黃髮台背

解見行葦

壽胥與試

箋曰胥相也。○曹氏曰老人髮白而更黃

背皺如鮐魚皮如是者相與試用則不特三壽作朋而已其所用皆老成之人也鮐音臺俾爾昌而

大俾爾耆而艾

五蓋反

萬有千歲眉壽無有害

公之兵車有大國千乘之賦矣每一車上皆有三人

右人持矛其矛有朱色之英飾左人持弓其弓有綠

色之繩縢約之此朱英綠縢者是二矛重弓也必二

必重者備折壞也又公之徒衆有三萬人矣萬二千

五百人為軍大國三軍合三萬七千五百人言三萬

舉成數也此徒衆其胄以貝飾之其甲又以朱綫連綴之進行之徒增增然衆多西戎北狄有來侵者以此膺當之荆楚羣舒叛逆者以此懲創之無有於我敢禦止之者此皆頌祝之辭也又祝使汝昌大而熾盛使汝壽考而富足又髮有黃色背有鮐魚文之壽者相與試其才以為之用欲其所用皆老成人也又重慶之使汝昌而且大使汝耆壽而且老艾萬有千歲得秀眉之壽而無有患害也萬有千歲猶曰千歲

萬歲也

泰山巖巖

疏曰泰山在齊魯之間二國皆以為望也

魯邦所詹

傳曰詹至也

奄有

龜蒙

箋曰奄覆也○傳曰龜山也蒙山也○疏曰春秋定十年齊人來歸鄆謹龜陰之田謂龜山之北田

也論語說顓臾主蒙山也魯之境內有此二山

遂荒大東

傳曰荒有也○箋曰荒奄也大東極東也

至于海邦

箋曰近海之國也

淮夷來同莫不率從魯侯之功

言泰山之高巖巖然魯之邦境所至也又奄有龜山

蒙山遂荒奄極東之地至於近海之國淮夷舊不服

者亦內向而不為異凡此東方之國莫不相率而順

從是魯侯僖公之功也願之之辭也

保有鳧繹

鳧音符繹音亦字又作嶧○傳曰鳧山也繹山也○疏曰禹貢徐州嶧陽孤桐謂嶧山之

陽有桐木也

遂荒徐宅

傳曰宅居也○曹氏曰禹貢徐州之地而魯宅之故曰徐宅

至于

海邦淮夷蠻貊

音陌

及彼南夷

疏曰南夷謂荆楚

莫不率從莫敢

不諾

箋曰諾應辭也

魯侯是若

傳曰若順也

僖公又安有鳧山繹山遂荒奄徐州之居至于近海

之國若淮夷也南夷之蠻也東夷之貊也又及彼南

方之夷荆楚也莫敢不相率而順從莫敢不應諾其

命令唯魯侯僖公之是順此亦願之之辭也

天錫公純嘏

音假○箋曰純大也受福曰嘏

眉壽保魯居常與許

傳曰常許

魯南鄙西鄙○箋曰許許田也魯朝宿之邑也常或作嘗在薛之旁春秋魯莊公三十一年築臺于薛是與周公嘗邑許田未聞也六國時齊有孟嘗君食邑於薛○疏曰常為南鄙許為西鄙或當有所依據不知出何書也桓元年鄭伯以璧假許田公羊傳許田者何魯朝宿之邑也此魯朝宿之邑曷為謂之許田諱取周田繫之許近許也春秋於僖公之世不書得許田益經傳闕漏故無其事也○朱氏曰常許皆魯之故地見侵于諸侯而未復者故魯復周公之宇魯侯燕喜令妻壽母

朱氏

曰僖公娶於齊曰聲姜母曰成風

宜大夫庶士邦國是有既多受祉黃

髮兒齒

兒音倪字書作覲○箋曰兒齒亦壽證○釋文曰兒齒齒落更生細者

言天賜僖公以大福使有秀眉之壽而保守魯國又能居常邑與許邑以復周公之故居常許魯之故地而未復者也僖公燕飲而喜樂內有令善之妻壽考之母又外有大夫衆士與之相宜魯之邦國僖公常保有之既多受其福又有黃色之髮落而更生之齒皆壽證也此願其壽考以復魯之侵地宜其室家臣庶以保有其國也

徂來之松

傳曰徂來山也

新甫之柏

傳曰新甫山也

是斷是度

斷音短度音鐸

○疏曰斬斷之量度之

是尋是尺

傳曰八尺曰尋

松栢有舄

栢音角舄音昔○傳曰栢

椽也舄大貌

路寢孔碩

傳曰路寢正寢也○箋曰碩大也

新廟奕奕

音亦○朱氏曰

僖公所脩之廟也○傳曰新廟閔公廟也○箋曰脩舊曰新所新者姜嫄廟也○疏曰奕奕廣大也

奚斯

所作

疏曰奚斯公子魚也○傳曰有大夫子奚斯者作是廟也○箋曰奚斯作者教護屬功課章程也

孔曼且碩

曼音萬○傳曰曼長也

萬民是若

僖公於是乃脩造寢廟取徂來山之松新甫山之栢

於是斬斷之於是用八尺之尋十寸之尺以量之既

量其材乃用松為椽桷有舄然而大為君之正寢甚寬大而碩又作新廟奕奕然廣大此寢廟乃是公子魚所作謂監護工役之事也此寢廟甚長曼而碩大萬民以為順無咨怨不憚勞也○新廟或以為閔公廟或以為姜嫄廟皆不可知或以為新作之或以為脩舊而新之然春秋不書則知其非大工役脩舊之說得之

閔宮八章二章章十七句一章十二句一章三

十八句二章章八句二章章十句

詩緝卷三十五

欽定四庫全書薈要卷一千三十六

經部

詩緝卷三十六

宋嚴粲撰

商頌

譜曰商者契所封之地至湯則受命武王封微子啓為宋公其封域在禹貢徐州泗濱西及豫州盟豬之野自從政衰散亡商之禮樂七世至戴公時當宣王大夫正考父者校商之名頌十二篇於周太師以那為首歸以祀其先王孔子錄詩之時則得五篇而已乃列之以備三頌盟音孟。朱氏曰太史公云宋襄修仁行義欲為盟主其大夫正考父美之故追道契湯高宗之所以興作商頌蓋本韓詩之說諸儒多惑之者今考此頌皆天子之事非宋所有且其辭古奧亦不類周世之文而國語閔馬父之言亦與今序合韓詩太史公之說謬矣張

子云商頌之辭粹。曹氏曰契為堯司徒敷五教賜姓子氏封之於商。今上雒商是也。在漢屬弘農郡十四世而至湯。凡八遷都。湯始居商丘。後徙居亳。從先王居蓋帝嚳嘗都之也。自湯十九世而至盤庚。其間又復五遷。盤庚始居河北。其後遷河南。復居亳之殷地。即湯之故都也。後世或稱商或稱殷。或兼稱殷商。先儒謂商有三亳。二在梁國。一在河洛之間。故穀熟為南亳。湯所都也。蒙為北亳。亦曰景亳。湯所受命也。偃師為西亳。所謂河洛之間。盤庚所遷也。按九域志云。今南京有亳城。古景亳也。本帝嚳之墟。湯從都之。有亳。辛城有帝嚳亳。辛氏廟有湯廟。有伊尹冢。南京去亳三十里。則北亳其是歟。其後武王伐紂。成王黜殷。殺武庚。封微子於宋。以主殷祀。宋即商丘。唐火正閼伯之墟。契孫相土因之。湯亦嘗居焉。後雖遷都於亳。而商丘實為湯後且合於契初受封之號。故稱商云。○解頤新語曰。或者謂周成王始封熊繹於荊。至周惠王之時。魯僖公元年。始有楚號。遂疑

商時未有荆楚乃欲假此以實韓氏宋襄公之說殊不思荆自帝嚳九州已有荆州之名至禹貢分別山川則荆及衡陽為荆州乃在南即荆楚也荆岐既旅至於荆山乃在西蓋雍州之荆非荆州之荆也詩人以有二荆故以荆楚別荆岐耳既自古有荆孰謂周封熊繹始有荆哉

那

乃河反

祀成湯也微子至于戴公

疏曰凡十君除二及餘八君是微子之後

七世至戴公也

其間禮樂廢壞

箋曰禮樂廢壞者君怠慢於為政不脩祭祀朝聘養賢待賓之

事有司忘其禮之儀制樂師失其聲之曲折由是散亡也

有正考甫者

疏曰孔子得七世之祖

商頌十二篇於周之大師

大音泰。譜曰周用六代之樂故得有商頌

以那

為首

疏曰祀成湯之樂歌也大師先以那為首矣

猗與那與

潛箋曰猗與歎美之辭猶言美哉也。傳曰那多也。今日桑扈受福不那。

置我鞀鼓

朱氏曰置陳也商人尚聲臭味未成滌蕩其聲樂三闋然後迎牲即此是也。○傳曰鞀鼓樂之所成也。○疏曰王制云天子賜諸侯樂則以祝將之賜伯子男樂則以鞀將之注云祝鞀皆所以節樂是樂成亦由鞀也。○曹氏曰置則方設之而已既設而奏之春官小師掌教鞀祝敵壎簫管弦歌又眡瞭凡樂事播鞀擊頌磬笙磬皆以鞀為先鄭康成注大射禮云賓至則搖鞀以奏樂故天子賜伯子男樂則以鞀將之是以商人亦首奏焉頌如奏鼓簡簡箋曰簡簡和大也。○衍我烈祖衍看之去聲。傳曰衍樂也。箋曰烈祖湯也。○湯孫奏假音格毛如字。歐陽氏曰湯孫疏曰湯是殷家有功烈之祖。○斥主祀之時王爾自太甲以下至紂皆可湯孫不知所斥者何王爾。○今曰傳謂湯為人子孫今不從。○朱氏

曰假感格也

綏我思成

箋曰綏安也安我心所思而成之謂神明來格也禮記云齊之日思其居

處思其笑語思其志意思其所樂思其所嗜齊三日乃見其所為齊者祭之日入室儼然必有見乎其位周旋出戶肅然必有聞乎其容聲出戶而聽愾然必有聞乎其歎息之聲此之謂思成齊音齋儼音愛

淵淵

王氏曰淵淵深也深以言其聞之遠

嘒嘒管聲

嘒音諱○朱氏曰嘒嘒清亮也○王氏曰

細既和且平依我磬聲

傳曰依倚也○王氏曰殷尚聲○箋曰磬玉磬也與玉磬之聲

相依玉磬尊故異言之○疏曰磬非樂之主而云依磬聲明此異於常磬非石磬也書云戛擊鳴球謂玉磬也○朱氏曰玉磬堂上升歌之樂也張子曰玉磬聲之最和平者可以養心也其聲一定始終如一無隆殺也蓋執鼓管簫作于堂下其於赫湯孫於音烏○歐陽氏曰聲依堂上玉磬之聲於赫湯孫者謂於赫

湯之孫也不應自稱盛美之孫以誇其先祖

穆穆厥聲

箋曰穆穆美也。疏曰穆穆然而美者其

樂之

庸鼓有數

庸如字依作鑄數音亦○傳曰大鐘曰數音聲

數然有次序

萬舞有奕

音亦○萬舞解見邶簡兮○今曰毛鄭以奕為閑習王氏以為綴兆衆大

今從王○奕解見車攻

我有嘉客

箋曰嘉客謂二王後及諸侯來助祭者

亦不夷懌

今日夷平也懌悅也

自古在昔

錢氏曰自古謂古已後也

先民有作

溫恭朝夕執事有恪

傳曰恪敬也

顧予烝嘗

疏曰秋嘗冬烝

湯孫之

將

蘇氏曰將奉也○曹氏曰自古在昔先民有作者先王有作於前也顧予湯孫也

商人尚聲故猗與那與歎而多之美其設此鞀鼓也

鞀雖小鼓所以節樂故首言之既設此鼓而後奏之
簡簡然其聲和大以衍樂有功烈之祖成湯也時王
湯孫奏樂以感格於祖考祭祀則思其祖考若神不
來格則所思不遂今神明來格是安我所思而成之
也其鞀鼓之聲淵淵然深其管聲嘒嘒然清亮皆和
平不相奪倫又依此玉磬之聲也歎美此赫赫成湯
之孫其作樂祭祀之時其聲穆穆然美鏞與鼓數數
然盛為萬舞者奕奕衆大二王之後及諸侯來助祭

者亦不平夷悅懌乎先民猶言前人也作承上文謂作樂也言聲樂之盛非今日始作之乃古昔之時前人所作也謂湯之功大人聞其樂而悅懌其來久矣今溫恭於朝夕之間執事必敬以省眡烝嘗之祭者乃湯孫之所將奉也謂湯之澤無窮故子孫世世奉祀焉

那一章二十二句

烈祖祀中宗也

箋曰中宗殷王太戊湯之玄孫也有桑穀之異懼而脩德殷道復興故表顯之

號為中宗。○疏曰：祀中宗之樂歌也。
禮王者祖，有功宗有德，不毀其廟。

嗟嗟烈祖

補傳曰：言烈祖而云嗟嗟，以簡朴故也。若周頌言於穆於皇，乃近於文矣。○箋曰：功烈之祖成

湯

有秩斯祜

音戶。傳曰：秩，常也。蘇氏曰：秩，秩無窮之福。○箋曰：祜，福也。

申錫無疆

傳曰：申重也。

及爾斯所

箋曰：及，女之此所。女，中宗也。言承湯之業能興之也。○朱氏曰：斯所，猶言

此處也。○今日及猶與也。猶生甫及申之及。

既載清酤

音戶。傳曰：酤，酒也。

賚我思成

傳曰：賚，賜也。○思，成解見那。

亦有和羹

箋曰：和羹者，五味謂腥熟得節。○疏曰：昭二十年左傳：晏

子云：和如羹焉。水火醯醢鹽梅以烹魚肉，燂之以薪。宰夫和之，齊之以味，濟其不及，以洩其過。君子食之以平，其心君臣亦然。故曰：亦有和羹。既戒既平，燂闡展二音。齊音劑。又如字。○曹氏曰：銅羹也。○詩故曰：祭之物，脩

矣其曰和羹則合衆味而成者惟羹為然

既戒既平

朱氏曰戒宿戒也平平和也○詩記曰儀禮載

祭祀燕享者每始言羹定蓋以羹熟為節然後行禮定即戒平之謂也此所謂既載清酤亦有和羹皆言祭之始

醴假無言

醴音樓假鄭音格毛如字○傳曰醴總也○箋曰假至也○今曰元鳥四海來假

時靡有爭綏我眉壽黃耆無疆約軹錯衡

軹音祁○八解見采芑

鸞鵠鵠

音鉞○箋曰鸞在鑣四馬則八鸞鵠鵠聲和也○八鸞解見采芑○疏曰鄭於秦風駟鐵之箋

云置鸞於鑣異於乘車禮記云鸞在衡則鄭以乘車之鸞必在衡而此云鸞在鑣者以鸞之所在經無正文而殷周或異故從舊說以以假以享我受命溥將

蘇氏曰溥且大

也○歐陽氏曰我時王受天命溥將

自天降康

箋曰下平安之福

豐年穰穰

如羊反○

執競傳曰穰穰衆也○疏曰穰穰每物豐多也○來假來

○朱氏曰天降以豐年黍稷之多使得以祭也

饗歐陽氏曰上云以享者謂諸侯者來助致享降福無

於神也下云來饗者謂神來至而歆饗也

疆顧予烝嘗湯孫之將疏曰中宗之饗此祭由湯之功故本言之雖中宗之子孫亦是

湯遠孫故亦得言湯孫也

嗟乎我烈祖成湯有秩秩之常福以申錫後人之無

窮也時祀中宗故以此所指中宗故及爾中宗者謂

湯創之中宗興之商祚久長皆湯及爾中宗為之也

以中宗配創造所以大中宗之功也今我祀中宗之

時既載清酒於樽以酌獻故神明賜我所思而成之
謂其來格也亦有和羹其事既戒謹而不苟其味既
和平而適宜執事之臣總至而無譁又不交侵其職
位以有紛爭所以神明安我以眉壽黃耆之福也諸
侯來助祭者其車以皮纏約其軹又有文錯之衡其
八鸞之聲鶴鶴然和以此格神以此獻神我時王受
天命廣大天降以康安之福使豐年黍稷之多穰穰
然也年豐則民安故以年豐為降康亦謂之康年也

以格神而神來格以享神而神來饗降以無窮之福也今省顧烝嘗之祭無所不致其謹者乃湯孫之所將奉辭與那頌同而意各有所主那美湯此詩美中宗謂湯之子孫世世奉烝嘗之祭者以中宗中興之功也

烈祖一章二十二句

玄鳥祀高宗也

箋曰高宗殷王武丁中宗玄孫之孫也有鳴雉之異又懼而修德殷道復興故

亦表顯之號為高宗云○

疏曰祀高宗之樂歌也

此詩祀高宗而先述祖德謂其能中興不墜先烈也

天命玄鳥

傳曰玄鳥皐也皐音乙○李氏曰燕也其色黑故謂之玄鳥

降而生商

傳曰

春分玄鳥降湯之先祖有娥氏女簡狄祈于郊禱而生契故本其為天所命以玄鳥至而生焉○箋曰契有功封商○疏曰記其祈福之時美其得天之命故言天命玄鳥使下生商也玄鳥之來非從天至而謂之降者重之若自天來然宅殷土芒芒

箋曰湯始居亳之殷地而受命國日益以廣大疏曰殷是亳地之小

別○傳曰芒芒大貌

古帝命武湯

箋曰有威武之德者成湯

正域彼四方

今曰以四

方為疆域方命厥后

鮮于氏曰隨其所在之方而命羣后也○朱氏曰方命厥后四方諸侯無不受

也命奄有九有

傳曰九有九州也○箋曰覆有九州為主也

商之先后

疏曰先后成湯

也受命不殆

疏曰殆危也

在武丁孫子

傳曰武丁高宗也○疏曰毛以為湯受天

命所以不至危殆者在武丁孫子武王靡不勝

毛音升

鄭音去

聲○疏曰毛以為武丁善為人之孫子行其武德之王道無所不勝任之也

龍旂十乘

去聲龍

旂解見出車○箋曰十乘者二王後八大州之大國○疏曰八州大國謂州牧也

大糇是承

糇音熾○

箋曰糇黍稷也○李氏曰武丁中興諸侯莫不助祭于京師

邦畿千里

傳曰畿疆也

維民

所止

曾氏曰人於其所歸赴則止焉商之盛時邦畿千里民所歸之也

肇域彼四海

疏曰

肇當訓為始王肅云殷道衰四夷來侵至高宗然後始復以四海為境域也○朱氏曰言王畿之內民之所止

不過千里而其封域則極乎四海之廣也

四海來假

音格○箋曰假至也

來假祁祁

箋曰

祁祁衆多也

景員維河

員毛音圓鄭音云○傳曰景大也員均也○朱氏曰河商所都如盤庚民

不肯涉河以遷即此河也景員維河則以諸侯輻輳而至於河也

殷受命咸宜百禄是

何○河之上濁○傳曰何任也○箋曰謂擔負天之多福

契母簡狄於春分玄鳥至之日祈于高禖而生契故

推本言之謂殷之興非人所能為也乃天命此玄鳥

使下而生此商國契封於商其後因之以為一代有

天下之號言生商謂生契也契封於商而商因以興

是生契所以生商也其後子孫遂居亳之殷地國土

芒芒然廣大謂湯也始居亳殷也古者上帝命其威
武之湯令其正域於四方謂以四方為界域天下一
統也湯承帝之命乃隨其方以施命令於諸侯遂覆
有九州即所謂域彼四方也以四方為界域則九州
在其中矣天命湯以四方為域湯能命其諸侯而奄
有九有成天意也先后即成湯成湯之興天實命之
其後中微天命幾危矣武丁能振起之故言成湯所
受天命不至於危殆者在武丁能為人之孫子盡繼

述之義也又言武丁所以能為人之孫子者以有威

武之王德無所不勝任故當時諸侯服從皆來助祭
有建龍旂者十乘於祭之時有大黍稷之食諸侯奉
承而進之也十乘舉諸侯之尊者言之謂二王後及
八州之牧也邦畿之內地方千里維是民之所安止
也言民志定也湯本以四方為域今言始以四海為
域者殷道中微侯國有畔者故疆土非先王之舊至
高宗中興始復之也京師諸夏之根本王畿之內人

心安定則四海之大皆在統理之內故四海皆來朝
覲其至也祁祁然而多河都有廣大均平之象諸侯
輻湊則京師氣象盛大於是總美殷家前後相承受
天之命無有不宜能負何天之百福謂成湯至高宗
也○或以武丁孫子為武丁之孫子然子孫祀其先
王而夸言己之武德義未為安況武丁之後無顯王
乎○今考自湯至盤庚五遷湯遷亳仲丁遷囂河亶
甲居相祖乙遷耿盤庚又遷亳亳囂皆在河南相耿

皆在河北自盤庚之後傳三世至武丁又傳四世至
庚丁凡八世皆居亳庚丁之子武乙始去亳徙河北
此詩所言河正指亳也亳有三蒙為北亳穀熟為南
亳偃師為西亳湯自南亳遷西亳盤庚所遷即西亳
偃師是也

玄鳥一章二十二句

長發大禘也

禘音第。疏曰大禘之樂歌也。王氏曰
雖序以為禘太祖周無四時之禘故也。今

曰大禘則商有四時之禘故也。四時之禘為小則禘其
祖之所自出為大。○橫渠張氏曰禘其祖之所自出則

禘饗○呂氏曰古者天子諸侯三年喪畢皆合先祖之神而享之以生時有慶集之權死應備合食之禮故時祭之外復為禘祫也虞夏商皆以間歲為之周則五年而再盛祭

濬哲維商

濬音峻○傳曰濬深也○李氏曰惟其德之深故不溺于褊淺惟其德之明故不至於昏塞商先世皆有

深智之德

長發其祥

箋曰長猶久也久發見其禎祥矣

洪水芒芒

傳曰洪大也禹

敷下土

呂氏書說曰禹先分布九州之土地規畫既定然後用工

方外大國是疆

傳曰

諸夏為外○疏曰對京師為外也疆謂弼成五服之時也詩言商興所由止須言契而已乃述禹敷下土者以契禹俱事帝堯皆有大功幅隕既長

幅音福隕音圓徐音雲○傳曰幅廣

也隕均也○疏曰幅如布帛之廣也禹平治水土中國既廣平且長也

有城方將

城音崧○傳曰

有娥契母也將大也。○疏曰有娥契母之姓婦人以姓為字。○箋曰禹敷下土之時有娥氏之國亦始廣大

帝立子生商

今曰子女也大明大邦有子。○疏曰天為之生立其子而使之生商謂天上祐契使

賢而生有

商國也

有深濬明哲之德者維我商家也久發見其興王之
祥矣時未興王其祥先見也蓋自洪水茫茫禹分布
下土而治之其方外諸夏之大國皆畫其疆界各正
其守使中國廣大均平而且長遠當此之時契母有
娥氏之國方大而天為之立其子簡狄使之生商商

者一代有天下之號生商謂生契也契封於商而商

因以興是生契所以生商也此非祥之久發見乎

玄王桓撥

傳曰玄王契也撥治也。疏曰國語云玄王勤商十四世而興玄王為契明矣國語又云

我先王后稷又曰我先王不窋是其為王之祖非追號為王也。歐陽氏曰書稱格王寧王蓋古人往往以美

稱加王爾玄者深微之謂也老氏言玄之又玄是矣不必為黑也。蘇氏曰桓武也受小國是達

受大國是達

王氏曰受小國是達受大國是達者隨所受大小能達其道也達與在邦必達同意

率履不越

王氏曰循行無所踰也錢氏曰不越於道遂視既發相土烈烈

相去聲。傳曰相土契孫也烈烈威也

海外有截

箋曰截整齊也相土居夏后之世承契之業入

為王官之伯出長諸侯其威武之盛烈烈然○疏曰相
土止為一國之君而已不得威行海外今云海外有截
故知入為王官之伯出長諸侯也僖四年左傳管仲說
太公為王官之伯云五侯九伯汝實征之以夾輔周室
是王官之伯分主東西得征其所職之方分主東西則
威加一面而已而云四海者不知所主何方故總舉四
海言之截然整齊謂守其所職不敢內侵外畔也王肅
云相土在夏為司馬之職掌征伐也說春秋者亦以太
公為司馬之
官與鄭異

玄王尊契之稱玄者稱其德之深微也契桓武而能
撥治受小國大國皆能達其道無往不宜循行於道
無所踰越從容中道也斯民遂視倣之而發發矣契

之孫相土入為王官之伯出長諸侯其威武之盛烈烈然海外率服截然整齊

帝命不違

蘇氏曰違去也

至于湯齊

蘇氏曰至湯而王業成與天命會焉

湯降不

遲

傳曰不遲言疾也。蘇氏曰湯之所以自降下者甚敏而不遲

聖敬日躋

傳曰躋升也。李氏

曰湯能降已不遲故德日進

昭假遲遲

假毛音格鄭音瑕

上帝是祗

箋曰祗敬也

帝命式于九圍

傳曰九圍九州也。李氏曰帝命之為法於天下也

商自契以來天命所嚮未嘗去之然至湯而後與天齊謂王業至此而成天命至此而集天人適相符合

也湯之謙抑所以自降下者甚敏而不遲故聖敬之
德日以躋升也敬為聖人之敬言至誠也日躋言至
誠無息也德日新又日新是聖敬日躋之實即文王
之純亦不已也其昭格于天遲遲甚緩言湯無心於
得天付之悠悠也湯無所覬倖故惟上帝是敬其誠
專一然天自命之以為法於天下使為王也

受小球大球

音求○傳曰球玉也○王氏曰小國大國所贄之瑞也

為下國綴旒

綴徐張衛反本音輟○箋曰綴猶結也旒旌旗之垂者也結定其心如旌旗之旒縿著焉縿音杉著直畧反○

疏曰綴著於縿也襄十六年公羊云君若贅旒然言諸侯反繫屬於大夫也此言綴旒文與彼同秋官大行人及考工記說旌旗之事皆云九旒七旒爾雅說旌旗云練旒九是旌旗垂者名為旒也○詩故曰旂所垂為旒衆旒所著為縿何天之休何上聲不競不綈音求○箋曰競爭也○傳曰綈急也不

剛不柔敷政優優傳曰優優和也百祿是道慈秋反○傳曰道聚也

湯受小國大國所贄之瑞諸侯心繫天子如旌旗之旒綴著於縿諸侯皆服屬於我此所以負荷上天之福也湯又不爭競不急躁不太剛猛不太柔弱陳政教則優優而和故百祿聚而歸之

受小共大共

毛音恭鄭音拱。王氏曰小國大國所為共之貢也。今曰無逸萬邦惟正之供為

下國駿龐

駿音峻一音俊龐莫邦反。傳曰駿大也龐厚也。曹氏曰小國大國共貢賦所以享上

也然皆出於民力惟薄取之而不使其傷財害民則厚下之道也

何天之龍

鄭作寵敷如字

奏其勇不震不動不難不竦

難奴版反。傳曰難恐也竦懼也

百祿是

總

湯受小國大國之共貢惟薄取之所以大厚天下非謂既受而復散之也故能何天之榮寵又陳進其勇不震驚不搖動不難恐不竦懼毅然以天下自任此

百禄所以總而歸之也

武王載旆

蒲貝反。傳曰：武王湯也。旆，旗也。疏曰：載其旌旗。曹氏曰：載旆則指其所伐之國也。

有虔秉鉞

音越。補傳曰：虔，敬也。今曰：鉞，揚也。解見公劉。

如火烈烈，則莫我

敢曷

王氏曰：曷者，誰何之謂也。

苞有三蘖

五葛反。傳曰：苞，本也。蘖，餘也。朱氏曰：蘖，旁生萌

蘖也。言一本生三蘖，本則夏桀也。則韋也。顧也。昆吾也。

莫遂莫達，九有有截

箋曰：齊壹

截韋顧既伐，昆吾夏桀

箋曰：韋，豕韋彭姓也。顧，昆吾皆己姓也。三國黨於桀，惡湯先伐

韋顧，昆吾夏桀則同時誅也。

有威武之王，成湯載其旗，旆虔敬以秉持其鉞，恭行

天討也其威勢如猛火烈烈之盛莫敢誰何者一本
生三蘂桀為亂首韋也顧也昆吾也以惡相濟然莫
能遂達其惡於是九州截然齊一以歸於湯湯則先
伐韋顧次伐昆吾夏桀也

昔在中葉

傳曰葉世也

有震且業

疏曰震懼也。傳曰業危也。業業有考見常武。

錢氏曰書云肇我邦于有夏若苗之有莠若粟之有秕小大戰戰罔不懼于非辜所謂震且業也

允也

天子降予卿士

箋曰下予之卿士謂生賢佐也。疏曰言卿士者三公兼卿士也。卿士又解

見十月之交實維阿衡

傳曰阿衡伊尹也。箋曰阿倚也。衡平也。伊尹湯所依倚而取平故以為

官實左右商王

左右音佐又○箋曰商王湯也○劉氏曰禘于太祖則功臣與祭故言伊尹也

昔在中世湯未興之前國弱而震懼危業信哉天愛湯而子之乃為之生賢降予以卿士卿士謂誰實維伊尹為阿衡之官而佐助成湯以定天下也

長發七章一章八句四章章七句一章九句一章六句

殷武祀高宗也

疏曰祀高宗之樂歌也

捷彼殷武

捷音闔○傳曰捷疾意也○曹氏曰言其兵威神速所謂迅雷不及掩耳也○朱氏曰殷

武殷王之武也。○錢氏曰：謂殷之有武者，莫高宗若也。

奮伐荆楚

傳曰：荆楚，荊州之楚國也。○疏

曰：周有天下，始封熊繹為楚子。於武丁之世，不知楚君何人也。○李氏曰：荆楚在商周之時，為夷狄之國，世亂則先叛。世治，則後服。當湯之時，必不敢抗衡中國。及商室中微，往住為中國患。此高宗所以討之也。采入其阻。

采音彌。阻音俎。○傳曰：采深也。○箋曰：阻，險阻也。

裒荆之旅

裒，蒲侯反。○傳曰：裒，聚也。

有截其所

曹氏曰：王師所在，截然無敢犯之者。湯孫之猶常武，所謂截彼淮浦，王師之所也。

緒

朱氏曰：湯孫謂高宗也。

捷然而疾者，殷王之武也。奮伐荊州之楚國，深入其險阻之地，裒聚其衆，伐罪而安其民也。故所伐之處

所截然齊一此湯孫高宗之功業謂其功足以繼湯也

維女荊楚

女音汝

居國南鄉昔有成湯自彼氐羌

氐音低○箋曰

氏羌夷狄國在西方也

莫敢不來享

箋曰享獻也

莫敢不來王

箋曰世見曰王

○疏曰氐羌遠夷一世而一見於王秋官大行人云九州之外謂之蕃國世一見謂其國父死子繼及嗣王即位乃來朝是

曰商是常

朱氏曰此商之常禮也

之謂世見也

二章言責楚之義爾荊楚居國南方比之氐羌則近國耳成湯之時自彼氐羌猶莫敢不來獻享莫敢不來

朝見謂此禮是商之常也況汝荆楚曷敢不至哉

天命多辟

音壁下同○傳曰辟君也○
箋曰多衆也衆君諸侯也

設都于禹之績

箋曰禹平水土弼成五服而諸侯之國定是以云然

歲事來辟

箋曰來辟猶來王也

勿予禍

適

音謫○傳曰適過也

稼穡匪解

音懈

既伐荆楚諸侯畏服故言天命諸夏之君凡建國于

禹功之內者咸以歲事來見於王以祈王之不譴曰

予稼穡匪解庶可以免咎矣

王氏曰高宗能治夷狄故天下無有不服

天命降監

箋曰降下也

下民有嚴不僭不濫不敢怠遑命于

下國封建厥福

傳曰封大也

上章言天命諸侯朝于天子此章言天命天子以察諸侯天命高宗降監諸侯之國有嚴敬其民賞不敢僭刑不敢濫不敢怠遑者則命于下國而封殖之以福也○此章從王氏也舊說謂天降監於民命湯由七十里以王天下此詩首章便從高宗說起言自彼成湯者述高宗援湯以責楚之辭耳非專述湯事也不當於此章攙入成湯上下章文意皆不貫矣

商邑翼翼

傳曰商邑京師也。○錢氏曰翼翼整治貌。翼翼考見采薇。

四方之極赫赫

厥聲

疏曰赫赫顯盛也。

濯濯厥靈

疏曰濯濯光明也。○李氏曰大也。

壽考且寧

以保我後生

商邑之治翼翼然嚴整乃四方之中言政教取正於此也聲譽赫赫乎顯盛威靈濯濯乎光明高宗中興之盛如此宜享壽考康寧之福而且可以安後嗣子孫也

陟彼景山

疏曰景山大山也。

松柏丸丸

傳曰丸丸易直也。○錢氏曰圓直也。

是斷

是遷

斷音短。傳曰遷徙也。○疏曰謂徙之來歸也。

方斲是虔

斷音卓。○疏曰方正也。○釋文

曰斲斫也。○傳曰虔敬也。○錢氏曰虔盡力也。

松桷有桯

丑連反。○傳曰桯長貌。

旅楹有

閑

箋曰旅衆也。○疏曰閑大也。○錢氏曰閑整也。

寢成孔安

升彼大山取松柏丸丸然圓直者斬斲之遷徙之又方正而斲之工匠之事莫不虔敬以松為屋之榱桷桯然而長其衆楹柱有閑然而大廟中之寢既成以安高宗之神也此蓋廟成始祔而祭之之詩也

殷武六章三章章六句二章章七句一章五句

詩緝卷三十六

謹案卷三十四第九頁前六行始柝以除其木刊
本柝訛作今改

第十一頁後六行荼委葉刊本委訛婁據爾雅改
第十五頁前二行三行士用兕觥刊本訛作大用
兕觥據毛詩箋改


卷三十五第四頁後六行蒼白雜毛騅刊本毛訛
色據爾雅改

第十七頁後八行設牛角以楅之也刊本以訛其

據詩毛傳改

卷三十六第一頁前五行校商之名頌十二篇刊
本名頌十說作詩則得據鄭譜改





總校官庶吉士臣侍朝

校對官中書臣潘奕雋

謄錄監生臣王遇亨